



內制集卷第五

歐陽文忠公集八十六

賜樞密使山南東道節度使同中書門下平

章事賈昌朝生日禮物口宣 九月五日

卿位峻樞庭望崇舊老屬誕期之斯及顧寵數以宜
優體乃眷懷膺茲蕃錫

皇帝賀契丹皇帝正旦書

正月一日伯大宋皇帝致書于姪大契丹聖文神武
睿孝皇帝闕下玉曆正時布玉春而茲始寶隣敦契
講信聘以交修方履新陽益綏多福其於祝詠罔罄
敷言今差朝散大夫守太常少卿上騎都尉渤海縣

開國男食邑三百戶賜紫金魚袋吳中復供備庫使
銀青崇祿大夫檢校太子賓客兼御史大夫騎都尉
廣平縣開國男食邑三百戶宋孟孫充正旦國信使
副有少禮物具諸別幅專奉書陳賀不宣白

皇帝賀契丹太皇太后正旦書

正月一日姪大宋皇帝謹致書于嬪大契丹仁慈聖
善欽孝廣德安靜正淳懿和寬厚崇覺儀大太皇太
后闕下歲律更新春陽鬯達因履端之叶吉敦永好
以申歡載惟慈懿之和方集壽康之祉更希善攝用
副遐悰今差朝散大夫守太常少卿直昭文館護軍

廣陵縣開國子食邑五百戶賜紫金魚袋呂景初洛
苑使兼閣門通事舍人銀青崇祿大夫檢校太子賓
客兼御史大夫騎都尉清河郡開國侯食邑一千七
百戶張利一充正旦國信使副有少禮物具諸別幅
專奉書陳賀不宣謹白

賜知潁州徐宗沆進奉賀充國公主出降銀
絹馬等勅書

勅徐宗沆省所進奉賀充國公主出降絹五百疋事
具悉詩稱王姬之下嫁國著嘉禮而有儀惟臣職之
聿脩備物容而叙慶誠勤所至歎尚良深故茲示諭

想宜知悉冬寒汝比好否遣書指不多及

賜知建昌軍沈造勅書

勅沈造省所進奉銀珠稻米一十石計一百黃綰袋
事具悉汝職守軍符政兼民穡樂此有秋之實擇其
嘉穀之英式陳常貢之儀彌體恪官之意故茲示諭
想宜知悉冬寒汝比好否遣書指不多及

集禧觀凝祥池崇禧殿開啓祝聖壽年交金

籙道場密詞

十二月十日

伏以璇霄默運推四序以循行玉曆更新集萬靈而
交會俾清琳宇延格高真薦茲精一之誠祈乃純厖

之祉冀繇福祿均及含生

班荆館賜契丹賀正旦人使到闕酒果口宣

十二月十日

卿等歲律更端隣歡交聘載馳使傳方及國郊宜推
寵錫之恩式示眷懷之厚

瓊林苑開啓保祐聖躬祈福道場青詞

十二月十日

伏以四時成歲嘉慶彙之咸新百福自天荷衆真之
冥貺俾開靈囿恭講仙科恢寶祚之延長錫壽康之
遐永是惟降鑒享乃克誠

聖林苑開啓保祐聖躬祈福道場默表

伏以荷天地之鴻休席祖宗之丕業載惟勵翼敢怠
憂勤屬歲律之更端冀時禧之茂集俾嚴禁禦祇率
舊章庶通芬潔之誠仰格清真之馭伏冀錫齡斯永
降福孔多保邦祚於無窮均物生而咸被

啓聖院齋殿內權奉明德元德章穆皇后今
告遷赴普安院重徽隆福兩殿奉安祝文

嚮以雨水為災殿塗增緝亦既新於叢構庶來復於
真遊爰揆靈辰冀茲安妥緬惟慈佑丕鑒乃誠
皇帝親詣啓聖禪院告遷明德元德章穆皇

后赴普安院奉安祝文

嚮者因霖災之為沴飭殿構以增新洵穀旦之惟良
奉神遊而還止載深感慕躬薦芬馨式慰孝思冀茲
臨格

正月三日就驛賜契丹賀正旦人使內中酒
果口宣

卿等奉將隣好來會歲元載推一作寵賚之私宜極
珍豐之品俾頒嘉味式侑宴歡

瓊林苑交年禱祭太歲諸神祝文

天行有度運三統以環周歲德所臨從百神而拱列

載洵毅且薦此令芳惟陰鑒之享誠委時祥而昭佑
班荆館賜契丹賀正旦人使到闕御筵口宣
十二月十四日

卿等曆紀歲元聘交隣好載馳使傳方及國門宜頒
宴犒一作推之恩式示眷懷之厚

賜夏國主進奉賀正馬駝詔

詔夏國主省所差人進奉賀正馬駝共一百頭足事
具悉履端紀歲萬邦咸稟於王正効貢以時奕世克
修於藩職載閱充庭之實深惟守土之勤遐體傾輸
不忘歎獎今回賜銀縮茶等具如別錄至可領也其

差來人所賜物色亦具賜目故茲詔示想宜知悉春
寒比平安好否書指不多及

賜夏國主贖大藏經詔 十二月 日

詔夏國主省所奏伏為新建精藍載請贖大藏經帙
籤牌等其常例馬七十疋充印造工直俟來年冬賀
嘉祐四年正旦使次附進至時乞給賜藏經事具悉
封奏聿來祕文為請惟覺雄之演說推善利於無窮
嘉乃純誠果於篤信所宜開允當體眷懷所載請贖
大藏經帙籤牌等已令印造候嘉祐四年正旦進奉
人到闕至時給付故茲詔示想宜知悉春寒比平安

好否書指不多及

賜新除觀文殿學士禮部侍郎孫沔詔

嘉祐三年

正月十七日

勅孫沔省所上表伏蒙聖慈差使臣賫到誥勅各一道授臣觀文殿學士禮部侍郎并賜對衣金帶鞍轡馬錢五百貫文不敢恭受伏乞特改差臣知一小郡或依例除一官致仕陳乞事其悉卿蔚有敏材膺予簡任外分邊寄嘗著於恩威入贊國機早參於帷幄風猷甚美寵遇既優適當擇帥之初方鑒用謀之失是惟慎舉實允僉諧豈宜圖自便之私而罔體眷懷

伏以珍宇邃嚴奉真靈而有素王容清穆謹修祓以惟時爰按仙科俾伸虔告載瞻道蔭宜鑒沖誠

皇帝回契丹皇帝告哀書

二月日伯大宋皇帝致書于姪大契丹聖文神武睿孝皇帝闕下承遣使車特貽緘翰不意凶變太皇太后上僊載惟契好久睦仁鄰聞此訃音但增感愴姪皇帝負荷至重追慕所深冀節哀情用遵禮制已差人使專持慰禮今林牙懷德軍節度使蕭福延回奉書陳謝不宣白

雄州撫問契丹賀乾元節人使口宣 二月二

十四日

卿等夙持信聘來講隣歡及疆候以惟初屬暄和之方盛宜加撫慰式示眷懷

賜給事中叅知政事曾公亮生日詔二月二十五日

卿蔚有時望叅于柄臣惟倚注之所深在眷顧之尤異屬茲誕日宜爾壽期膺此寵頒體予至意

賜翰林學士兼侍讀學士尚書戶部郎中知制誥知審刑院胡宿詔三月三日

勅胡宿省所奏據大理寺日奏司申二月二十一日

已前下寺公案並已斷奏了畢無見在事具悉朕欲斯民足衣食知禮讓而竊攘爭鬪之獄猶滋欲吾吏慎刑罰盡情偽而傳子輕重之文不一卿以儒學之職總評讞之繁克勤其官曾不留事實副予意惟時可嘉若乃使天下囹圄空虛而風流篤厚是亦論思獻納者之志其勉助我以共臻焉仍依奏宣付史館故茲獎諭想宜知悉

賜判大理寺陳太素并權少卿揚開及審刑院詳議官大理寺詳斷官等勅書三月三日

勅陳太素省知審刑院胡宿奏據大理寺日奏司申

二月二十一日已前下寺公案並已斷奏了畢無見
在事刑獄之重一成而不遷比類之微可疑者甚衆
汝好學而敏汝官以勤夫俾天下之無冤幾刑錯而
不用此朕翼翼希慕之所未及而爾孜孜厥職之所
不忘者也故茲獎諭想宜知悉

恩州賜契丹遺留使副茶藥口宣

三月二十八日

卿等夙馳使傳來達信函載惟涉履之勤當此暄和
之候宜加頒賚式示眷懷

瀛州賜契丹賀乾元節人使却回御筵口宣

四月八日

卿等既成聘好方即歸塗再惟將命之勞宜有犒
之錫俾伸宴飫用示眷私

班荆館賜契丹賀乾元節人使却回酒果口

宣 四月七日

卿等使軺復命郊館餞行惟茲良潔之英薦以甘馨
之實用伸恩錫當體眷懷

十六日就驛賜契丹賀乾元節人使內中酒

果口宣

四月十七日

卿等夙奉信函方休賓館惟此醇甘之品用推寵賚
之恩聊侑宴歡以伸優遇

賜知舒州齊廓進新茶并知廣德軍浦延熙
進先春茶勅書
勅齊廓省所進奉新茶一銀合合重五十兩緋羅夾
復全事具悉百物茂生取新為貴羣方修職効貢以
時汝守土有方事上惟恪閱茲來獻用體勤誠故茲
示諭想宜知悉

賜外任臣寮進奉乾元節銀絹馬勅書

勅高易簡省所進奉乾元節絹五百疋事具悉汝夙
以敏材膺于東寄及此奉觴之節載陳任土之儀能
因物以達誠見事君之甚恪省閱于再歎嘉不忘故

茲示諭想宜知悉

班荆館賜契丹告哀人使內中酒果口宣

卿夙將隣訃方屆國門載惟衝涉之勤宜有宴休之
錫俾伸頌賚用示眷優一作優

開寶寺福勝院開啓道場於乾元節日支散
袈裟并設大會齋一中齋文

伏以正陽旅月方及於嘉時萬壽齊天式標於令節
啓真乘之祕藏集淨侶於法筵仰惟慈妙之仁茂委
純厖之祉永隆丕筭均福羣倫

東太一宮開啓保夏祝聖壽金籙道場密詞

四月二十四日

伏以寂然妙道推善應以無方瞻彼高靈薦精誠而必達屆此長贏之候是惟茂育之時爰稽玉笈之真文載潔雲壇之淨醮冀敷昭鑒來集純禧固壽曆之延昌溥蒼黔而均祐

賜彰信軍節度使檢校太保同中書門下平章事判大名府李昭亮乞知西京不允詔

勅昭亮省所上表乞移判河南府事具悉朕惟魏洛之重皆為別都將率所居難於屢易卿以中外勤勞之績有撫綏扞禦之材自膺寄任之雄方厚倚毗之

意遽茲列奏嘉乃好謙宜體眷懷靖安爾位所乞宜不允故茲詔示想宜知悉夏熟卿比平安好遣書指不多及

賜宣徽南院使淮康軍節度使張堯佐乞知

西京不允詔五月二日

勅堯佐省所奏臣皇祐三年內授宣徽南院使判河陽軍州事未滿任蒙詔赴闕供職至今六載自量戶素深不遑寧近知西京闕人未有除授伏望特賜差委事具悉宣導徽猷任親而事簡居留京邑地要而務繁惟予眷遇之臣方處清閑之職載披來牘深識

乃誠雖奮其聰明尚足以臨蒞而待我耆艾宜有以
優游實嘉盡瘁之心難徇為謙之意所乞宜不允故
茲詔示想宜知悉

賜宰臣文彥博上第一表乞解重任不允批
答 五月十八日

省表具之夫知其人之為賢任則勿貳事其君而有
道去不可輕此古之臣主之明舉措必慎所以收功
於一時而垂法於後世也卿夙有時望為予柄臣自
復秉於國鈞僅三周於歲序若乃進退賢否誅賞罪
功每於聽納之間敢志虛已顧彼搢紳之論曾靡異

辭方期有成以副予意而乃過形謙損思避台衡豈
寡德弗明於用才而不盡將多言害正致厥位之難
安苟異於斯夫何引讓矧卿忠信之節足以叶予之
一心材謀之優可以斷予之大事茲所東注寧煩諭
言所請宜不允

就驛賜契丹遺留使副銀鈔鑼唾盃孟子錦
被褥口宣 五月十八日

卿等馳輅來止將命有儀顧茲館憇之初宜具燕私
之用俾伸優錫式示眷懷

通商茶法詔 嘉祐四年二月四日

勅古者山澤之利與民共之故民足於下而君裕於上國家無事刑罰以清自唐末流始有茶禁上下規利乘二百年如聞比來為患益甚民被誅求之困日惟咨嗟官受濫惡之入歲以陳積私藏盜販犯者實一作繁嚴刑重誅情所不忍使田間不安其業商賈不通于行嗚呼若茲是於江湖之間幅員數千里為陷穽以害吾民也朕心惻然念此久矣間遣使者往就問之而皆歡然願弛摧法歲入之課以時上官一二近臣件拊其狀朕嘉覽于再猶若慊然又於歲輸裁減其數使得饒阜以相為生刻去禁條俾通商賈

歷世之弊一旦以除著為經常弗復更制損上益下以休吾民尚慮喜於立異之人緣而為姦之黨妄陳奏議以惑官司必寘明刑用戒狂謬布告遐邇體朕意焉

內制集卷第五

賜夏國贖藏經詔大藏經帙帙字上一有及經二字

通商茶法詔重誅峻一作誅

內制集卷第六

歐陽文忠公集八十七

恩州賜契丹皇太后賀乾元節大使茶藥詔

嘉祐四年二月二十四日

卿夙將信聘方止中塗惟茲藥錄之良加之一作茗

品之美特伸頌一作恩資式示眷懷

恩州賜契丹皇太后賀乾元節副使茶藥詔

同日

卿肅將聘幣來及壽觴載嘉道路之勤宜有頌宣之
寵仍伸撫勞當體眷優

恩州賜契丹皇帝賀乾元節大使茶藥詔同日

卿將命寶隣講歡壽節屬此暄和之候載惟涉履之
勤宜頒品劑之良式示眷懷之意

恩州賜契丹皇帝賀乾元節副使茶藥詔
卿夙副聘輶來陳壽祝顧川塗之攸邈屬氣節之方
和俾頒飲餌之精式助宣調之理

品之美端午帖子

皇帝閣六首

其一

天容清永晝風色秀含薰五日逢佳節千齡奉聖君
其二

綵索盤中結楊梅粽裏紅宮闈九重樂風俗萬方同

其三

寶典標靈日明離正午方五行當火德萬壽續天長

其四

歲時令節多休宴風俗靈辰重袞禳肅穆皇居百神
衛滌邪寧待浴蘭湯

其五

香菰黏米著佳名古俗相傳豈足矜天子明堂遵月
令含桃初薦黍新登

其六

聖主憂勤致治平仁風惠澤被羣生自然四海歸文
德何用靈符號辟兵

皇后閣五首

其一

繭館覆柔柔新絲引更長紉爲五色縷續壽獻君王

其二

槐綠陰初合榴繁豔欲然翠筒傳角黍嘉節慶年年

其三

煙含玉樹風生細日永宮花漏出遲深殿未嘗知暑

氣水精簾拂砌琉璃

其四

玉壺冰彩瑩寒光避暑宸遊樂未央采艾不須禳毒

沴塗椒自己馥清香

其五

蘭茗擢秀迎風紫槿豔繁開照口紅嘉節相望傳有

舊深宮行樂自無窮

溫成閣四首

其一

香黍筒爲稷靈苗艾作人芳音邈已遠節物自常新

其二

珠箔涼颼入金壺晝刻長鸞臺塵不動銷盡故時香

其三

聞說仙家事杳微世傳真偽豈能知遙思海上三山樂寧記人間五日時

其四

雲散風流歲月遷君恩曾不減當年非因掩面留遺愛自爲難忘窈窕賢

夫人閣五首

其一

冰壺疑皓彩水殿漾輕漣繡繭誇新巧縈絲喜續年

其二

黃金仙杏粉赤玉海榴房共闕今朝勝盈檐百草香

其三

光風細細飄香轉綠葉陰陰覆檻涼雲物鮮明時節麗水精宮殿侍君王

其四

蓬萊仙闕彩雲中端日一作午欣逢歲歲同皎潔霜紈

空詠扇深沈玉宇自生風

其五

古今風俗記佳辰樂事深宮日日新巧女金盤絲五

色皇家玉曆壽千春

皇帝回契丹皇帝賀乾元節書

四月日伯大宋皇帝致書于姪大契丹聖文神武睿
孝皇帝闕下乾陽正月紀茲載誕之辰隣聘修歡既
以千齡之祝書言既縟禮幣兼豐感著之私敷陳罔
罄今彰聖軍節度使蕭供等回專奉書陳謝不宣曰
皇帝回契丹皇帝太后賀乾元節書

四月日伯大宋皇帝致書于姪大契丹聖文神武睿
孝皇帝闕下壽節屆期隣歡悖契仍導柔慈之旨過
中延祝之言兼厚物容用增刻著顯希侍次達此悰

誠今左監門衛上將軍耶律侶等回專奉書陳謝不
宣白

恩州賜契丹皇太后賀乾元節人使茶藥口
宣

卿等夙奉信函及茲誕節載勤馳傳方止中塗宜有
寵頒用伸撫慰

恩州賜契丹皇帝賀乾元節人使茶藥口宣
卿等甫臨誕日來講隣歡載惟將命之嚴宜有勞勤
之錫俾伸寵賚式示眷嘉

天齊仁聖帝廟開啓祈祥迎福催生金錄道

場密詞

三月二十日

伏以高穹降慶方垂佑於邦家彌月告期用薦誠於
科籙冀衆真之昭鑒臻百順以儲休

廣聖宮開啓催生道場默表

三月二十日

伏以帶韜迎祥慶祺祠之叶應潔壇修薦致精懇以
冥祈俾因鱗瑞以通誠仰冀靈真之報福

內中福寧殿開啓天祺節道場青詞

三月二十日

伏以候臨初煥節紀嘉名肅嚴祕殿之居降集清真
之馭薦之馨苾報以善祥豈惟敷佑於眇躬兼冀均
休於庶品

內中福寧殿罷散天祺節道場青詞

同日

伏以薰風應候瑞節紀時按琳簡之真文嚴紫庭之
邃宇衆靈來格冥感交通嘉乃羣生蒙茲百福載傾
虔意鑒此明誠

後苑親稼殿開建鎮星祈福道場青詞

二月二十日

伏以祠祺叶應彌月告祥肅依科籙以薦誠仰冀照
臨之降鑒錫之祉福佑以休保一作寧惟集慶於邦家
未延鴻於基緒

萬壽觀開啓求嗣保安道場青詞

伏以廟社降祥宮庭叶慶載消吉旦交薦明誠期仰
格於清真俾敷延於祉福永昌基祚遐企靈休

景靈宮天興殿開啓催生保慶道場青詞

伏以誕彌叶慶蠲潔修誠嚴祕駿於靈宮誦真文於
藥簡通此苾芬一作芳之薦被其蓄害之虞仰冀昭回
玉符鑒祐

護國顯應公廟開啓保安催生道場青詞

伏以正陽旅月載育開祥式因靈宇之嚴交薦精衷
之潔仰冀衆真之貺敷昭百順之休永祚皇圖實希
道蔭

賜新除行刑部尚書依前觀文殿大學士知

陳州劉沆讓恩命不允詔四月五日

卿嚮以宰弼之崇屢形懇避居留之任因用均勞而
休風藹然嘉問時至方深眷倚遽閱奏封顧惟陪輔
之邦俾遂便安之請增之美秩優我舊臣豈祇循於
故常蓋以示夫褒寵膺受之際逡巡以辭雖言匪飾
文見於能讓而令行已出難矣復還其體余懷徃祇
新命

雄州白溝驛賜契丹賀乾元節人使却回御

筵兼撫問口宣四月十三日

卿等聘函時達使傳言旋冒茲炎燠之辰涉此川塗
之邈宜申宴錫式示眷懷

賜中書門下戒僭奢詔 五月四日

敕中書門下朕纘承丕基撫有方夏謂教之不可以
家至而行之每務於身先惟是儉勤敢忘勉勵期與
羣庶臻于富康而人殆久安驕於佚欲物豐太盛耗
以浮虛苟奉養以自私忘僭奢之為戾士民交黷貴
賤靡分惟其彊力之能無復等威之制考於著令雖
有舊章顧在攸司鮮聞用法民遂安於常習弊罔革
以滋深紀綱既紊於度程風俗以至於流蕩俾朕有

欲治之意不能副余之誠心而民多自陷之愚未免
煩余之訓導夫令信由於貴始下化先於上行眷予
一二之臣其率庶工而警職俾爾多方之衆勿踰常

憲

法

作

以于刑庶漸革於侈風以共趨於治路凡居

室之制器用之度冠服之章妾媵之數其令中外臣
庶遵守前後條詔如有違犯仰御史臺及開封府糾
察聞奏其諸路州軍即委轉運使提點刑獄臣察及
逐處長吏施行布告中外咸使聞知故茲詔示想宜
知悉

西太一宮續催生道場密詞 四月二十六日

伏以吉月迎祥靈祺叶應爰即清真之宇虔修科式
之儀冀祓滌於害災俾敷昭於福應載昌儲慶永佑
基圖

東太一宮開啓保夏祝聖壽金籙道場密詞
四月二十六日

伏以珍館邃嚴格真靈而來宅明誠蠲潔薦馨苾以
交修道迎百順之祥及此長羸之序伏願寶圖綿固
壽曆延長永敷佑於邦家溥均休於品庶

為將來禘享禮畢奏謝內中福寧殿并景靈
宮等處諸神表 六月二十五日

伏以清廟有嚴仲冬正序乃先時祭躬講禮文賴真
靈之集休俾容典之咸舉仰膺佳貺彌勵丹衷

為將來禘享禮畢奏謝諸寺院表 同日

伏以宗廟之嚴祭祀惟重矧茲合食之義尤為盛禮
之文乃顧眇躬克成大饗實繫貺祐用薦菲誠

內中為將來禘享禮畢奏謝露香表 同日

伏以月正仲冬禮成大饗所以序昭穆之位格祖宗
之靈荷清穹之降休俾盛典之獲舉敢伸昭謝冀達

精衷

為將來禘享禮畢奏謝諸寺院神御表 同日

伏以茲者祗率孝心躬修合祭潔精誠而是薦蒙顧
享之來臨惟慈聖之降休俾眇冲之成禮敢忘勵翼
永荷基圖

為將來裕享禮畢奏謝永安陵等處表 同日

伏以恭承先烈獲守慶基式因冬物之有成載肅廟
容而合食上繫丕貺克展孝思是惟感慕之誠益勵
祗寅之志

為將來裕享禮畢奏謝泰山廟等處表 同日

伏以茲者因歲物之冬成講祭容而時舉豆籩有序
禮樂交修願惟眇躬克遵盛典實賴明靈之佑敢忘

報貺之誠

賜步軍副都指揮使涇州觀察使秦鳳路副

都部署王凱赴闕茶藥口宣 六月二十五日

卿祗膺召節方屬都畿載惟道路之勤屬此炎薰之
候宜頒良劑式示眷懷

賜步軍副都指揮使涇州觀察使秦鳳路副

都部署王凱赴闕生料口宣 同日

卿出膺邊寄入恪觀容願就館以云初方奉圭而來
見宜頒餼勞式示眷懷

除宋庠制 加恩進封

門下盡其志以饗親因而餽惠爵于朝而示衆所以
褒功考祭典而可稽著國章而有舊矧乃樞機之任
惟余鼎鼐之臣飭事齊莊宣力左右方此慶行之始
宜推寵數之隆推忠協謀同德佐理功臣樞密使開
府儀同三司檢校太尉行兵部尚書同中書門下平
章事兼羣牧制置使上柱國廣平郡開國公食邑七
千八百戶食實封二千九百戶宋庠履行清純詭識
深茂夙有佳譽蔚為名臣文足以為國華學足以謀
王體入則登于三事備釐謨猷出則歿于大邦藹存
風績自還機務頗歷歲時秉一德以協恭出處不更

其守展四體而盡奔夙夜匪懈其勞屬盛禮之有成
廣推恩而自近按夫輿地特啓於新封加以寵名蓋
遵於故事惟是便蕃之錫式伸眷倚之懷於戲君子
者邦之基大臣者民之表搢紳之望所屬老成德業
之隆豈煩多訓服我休命往惟欽哉可特授依前檢
校太尉行兵部尚書同中書門下平章事兼羣牧制
置使充樞密使特封莒國公仍賜推忠協謀同德守
正佐理功臣散官勲食實封如故主者施行

除李昭亮制加恩

門下朕卜吉孟冬躬薦清廟祖考來格貺以百福之

多慶賜遂行均于四海之廣惟予將相之任是謂股肱之良宜擇剛辰誕揚休命忠果守正佐運翊戴功臣彰信軍節度曹州管內觀察處置等使開府儀同三司檢校太保同中書門下平章事持節曹州諸軍事行曹州刺史上柱國隴西郡開國公食邑一萬一千五百戶食實封三千四百戶李昭亮志尚純慤資識敏明世蒙舊德之餘早邁重熙之盛備于器使奮厥材猷好學詩書知將率之為體兼推威信撫士卒以克和入則有宿衛之勤出則著扞城之效寄之方面屢守於要藩班乃政條頗頗一作聞於佳譽乃眷別

都之重實司留鑰之嚴擁節秉鈞並享崇高之貴治戎撫俗兼資鎮靜之材茲惟圖任之艱方屬倚毗之意是用因霈恩之浹洽推異數之便蕃廣乃疏封增其真戶仍疇美績褒以嘉名於戲秉德不回所以見始終之操好謙自守乃能居寵祿之榮汝其欽哉膺此優渥可特授依前檢校太保同中書門下平章事使持節曹州諸軍事行曹州刺史充彰信軍節度曹州管內觀察處置等使加食邑七百戶食實封四百戶仍賜推誠保德守正佐運翊戴功臣散官勲封如故主者施行

除梁適制特授特進加恩

門下王者嚴其宗廟饗必及其時盡其誠心祭則受其福朕躬執圭瓚率諸臣工因百物之成冬格列聖而合食嘉與有位之衆均茲錫祉之繁矧惟槐鼎之舊臣實繫國家之大體宜優新命以告外庭推誠保德忠亮翊戴功臣定國軍節度同州管內觀察處置等使光祿大夫檢校太傅使持節同州諸軍事同州刺史兼御史大夫上柱國安定郡開國公食邑四千七百戶食實封一千五百戶梁適世胄之華早躋仕路藝文自奮繼踐辭科進階顯榮亟被獎擢優游侍

從之列嘗奉於清間出入中外之勤實勞於夙夜既贊樞府遂登宰司啓沃之謀話言猶在進退之際禮遇兼隆自歷藩垣頗更歲月近惟大鹵實宿勁兵俾分節制之權以爲方面之重撫茲雅俗藉爾斂材屬熙事之有成均慶恩而方洽是用敘陟崇階之貴兼增食戶之多推茲寵章蓋率舊典於戲執忠信之一節所以事君守富貴而不驕乃能終吉是惟素學寧假訓辭徃服茂恩當體予意可特授特進依前檢校太傅使持節同州諸軍事行同州刺史兼御史大夫充定國軍節度同州管內觀察處置等使加食邑七

百戶功臣勲封食實封如故主者施行

除許懷德制如恩

門下賞以懋功俾有能之知勸祭之為澤思在位以
咸均嘉盛禮之斯成務推恩而惟廣矧乃耆明之哲
是為心膂之臣宜示優隆式揚誕告衛聖忠果雄勇
翊戴功臣殿前都指揮使保寧軍節度婺州管内觀
察處置等使特進檢校尚書左僕射使持節婺州諸
軍事行婺州刺史兼御史大夫上柱國潁川郡開國
公食邑五千戶食實封一千二百戶許懷德勁勇之
質蓋稟天姿忠厚之良自為國器少有四方之志出

逢千載之辰蘊其材謀能自奮勵訓我士卒號令之
信甚明為予瓜牙介冑之色難犯爰採軍中之譽俾
分闡作外之權遂膺施節之榮專董貔貅之旅宿

衛宮禁周旋歲時宣力甚勤有知無不為之節盡瘁
後已加老而益壯之心誠未耗於精明豈但矜於矍
鑠屬受釐之均慶方浹宇以蒙休載推圖舊之懷式
叙疇勞之典益其封食錄乃功庸於戲享爵祿之崇
高荷寵靈之優渥挺金石不渝之操茲惟事上之誠
知富貴克守之難用保有終之吉勉矣來効往其欽
哉可特授依前檢校尚書左僕射使持節婺州諸軍

事行發州刺史兼御史大夫充殿前都指揮使保寧
軍節度發州管內觀察處置等使加食邑七百戶食
實封三百戶仍賜衛聖忠果雄勇宣力翊戴功臣散
官勲封如故主者施行

翼祖皇帝冊文

維嘉祐四年歲次己亥十月壬戌朔十二日癸酉孝
曾孫嗣皇帝臣某敢昭告于高祖翼祖簡恭睿德皇
帝伏以皇天眷命興德造邦始基之功實自積累獲
嗣丕烈敢忘翼勵孟冬吉月歲事既成合祭以時舉
茲禮典惟是備物將以誠懇之心神其歆之錫以多

福謹以一元大武柔毛剛鬣粢盛薌合薌其嘉蔬嘉
薦醴齊嚴恭備物式薦虔心高祖妣簡穆皇后劉氏
配尚饗

真宗皇帝冊文

維嘉祐四年歲次己亥十月壬戌朔十二日癸酉孝
子嗣皇帝臣某敢昭告于皇考真宗膺符稽古成功
讓德文明武定章聖元孝皇帝伏以古之以孝而饗
親者氣節既至感其思心初禘嘗烝禮以時舉然猶
未厭其志也則又大合祖宗而享焉顧惟小子克守
成業治民事神動有不訓是用躬執圭瓚薦其芬芳

佩

一作佩
又作佩

然如聞來格來既謹以一元大武柔毛剛

鬣染盛薌合薌其嘉蔬嘉薦醴齊嚴恭備物式薦虔
心皇妣章穆皇后郭氏皇妣章獻明肅皇后劉氏皇
妣章懿皇后李氏配尚饗

淑德皇后册文

維嘉祐四年歲次己夾十月壬戌朔十二日癸酉孝
孫嗣皇帝臣某敢昭告于皇祖妣淑德皇后尹氏伏
以彤管有煒內德茂焉清廟載嚴合食為重十月惟
吉備物有容威靈來臨昭穆序配薦以誠潔神其顧
思謹以一元大武柔毛剛鬣染盛薌合薌其嘉蔬嘉

薦醴齊嚴恭備物式薦虔心尚饗

賜樞密使宋庠讓恩命第一表不允批答

省表具之朕以因時致享克展於孝思已祭受釐大
均於慶澤乃眷耆明之哲實予體貌之臣肅臨事之
有容既交神而蒙矧宜推異數以示眷懷雖嘉好謙
曷止成命所讓宜不允

賜樞密使宋庠讓恩命第二表不允斷來章

批答

省表具之卿蘊純和端慤之誠富敏瞻通明之學惟
時舊德實我柄臣當祀事之有成廣慶恩而方洽疇

其封爵錫以號名茲爲寵章蓋舉常典無煩避讓其
往欽承所讓宜不允仍斷來章

賜樞密使宋庠讓恩命第一表批答口宣
熙事旣成方大均於祭澤寵章所異宜首及於樞臣
當即往膺勿煩沖讓

賜樞密使宋庠并河陽三城節度使判河南
府文彥博加恩告敕口宣

朕以饗親致孝餽惠均恩宜有寵章以襲舊德往欽
新命當體眷懷

閣門賜華原郡王允良感德軍節度使允初

告敕口宣

蔚爲賢王陪我祀事旣膺福貺宜被寵靈往體予懷
祇服新命

賜皇弟奉寧軍節度使華原郡王允良讓恩
命第一表不允批答

朕合食祖考以昭孝推恩宗族以展親所以厚人倫
明教愛卿以近屬肅然在庭能盡志以修容不違禮
而終事方慶典之均洽宜寵章之所先好謙之懷雖
可嘉尚已出之命其往欽承

賜皇弟奉寧軍節度使華原郡王允良讓恩

命第二表不允斷來章批答

卿擢秀宗英作屏王室從我祠事罄其齊明因餽惠之均恩示推仁而睦族避讓之節固已識於冲懷敦諭既勤宜往祇於成命

賜皇弟感德軍節度使允初讓恩命第一表不允批答

朕因時孟冬薦鬯清廟蒙祖考之來貺均慶賜以推行乃眷宗藩宜優寵數蓋克遵於舊典何過自於撓謙其欽訓言往服休命

賜皇弟感德軍節度使允初讓恩命第二表

不允斷來章批答

朕親款太宮致饗列聖蒙神貺其百福思慶及於多方乃眷宗藩宜優寵數惟是便蕃之錫式推敦睦之仁嘉乃冲懷形于懇避禮有常節無為過恭命之已行難或中止

賜皇弟華原郡王允良感德軍節度使允初讓恩命第一表不允批答口宣

卿以宗藩之近參闕祀之嚴爰疇乃勞優以異數宜思祇受勿復固辭

賜皇弟華原郡王允良感德軍節度使允初

讓恩命第二表不允斷來章批答口宣
知以宗支之賢陪廟祀之重均茲慶典遽述讓誠命
出已行理難中止所宜祇受以副予懷

內制集卷第六

內制集卷第七

歐陽文忠公集八十八

賜河陽三城節度使同中書門下平章事判

河南府文彥博加恩告勅詔

朕因孟冬之吉辰饗太宮而合食膺受神貺推行慶
恩眷惟同德之臣方處居留之任宜優異數少示眷
懷既敷告於外庭其往祇於休命

內中福寧殿開啓禘享預告道場青詞 十月

十九日

伏以宗廟之嚴禘祭為重乃卜孟冬之吉躬修合食
之儀仰企上靈冥孚陰佑俾克成於盛禮冀永錫於

純禧式展孝思用膺神貺

在外五嶽四瀆四海并諸神廟等處謝禘享

禮畢祝文 十月十九日

屬者卜吉孟冬致饗清廟聖靈來格福祉沓臻荷神
貺之不違俾縟儀之克舉敢忘神報達此明誠

泗州塔下并峨嵋山開啓謝禘享禮畢道場

齋文

茲者冬物告成因饗親而達孝神釐來貺既均慶之
以時惟盛一作禮之弗違荷巨慈之旁祐即靈場而
申報冀冥鑒之孔昭薦此誠明期於福應

太平興國寺開先殿開啓孝明皇后忌辰道

場齋文 十一月一日

伏以承明之範瞻厚德而已遐感慕之思託洪慈而
申薦載嚴寶殿恭慈貝函惟淨福之是資冀靈游之

永祐

太平興國寺開先殿開啓孝明皇后忌辰道

場功德疏右語

右伏以真覺之慈應物溥示於能仁孝思之感以時
式臨於靜旨俾延滂偈交奏梵功冀承勝利之因衆
獲冥深之祐

賜西南蕃蠻人張光現等敕書十一月三日

汝世守邊疆遠輸忠順時修職貢附達款誠載嘉勤
格之志宜示褒優之錫

賜宰臣富弼乞退不允批答

省表具之夫知人之明可謂難矣而任賢之術豈
易哉若乃聽之不聰信之不篤施設之方未盡弗極
其材遲速之効有時莫能少待則被其任者實亦艱
歟卿以純一忠亮之誠蘊宏深遠大之業朕虛已以
聽推心御成至於之之臣是惟同德下逮衆多之
論曾靡間然方將甄敘賢愚修明法度務究本根而

更治不求歲月之近功期於有成茲乃予意奈何中
道而將止夫亦奚託以為辭矧上下既交寧有不通
之志而君臣相遇豈為易得之時當體余懷勉安厥
位所乞宜不允

賜外任臣寮進奉助裕享銀絹等敕書

朕十吉孟冬合食清廟禮樂交舉臣工畢從嘉守土
之修官咸以時而來助各以其物粲然在庭載省勤
誠良深歎尚

賜觀文殿學士禮部尚書王舉正乞致仕不

允詔十一月十四日

夫朝廷之廣大賢雋之衆多必有皤然耆壽之臣以當上所優禮之異或事思所訪則有老成俾時之式瞻以爲人望故禮雖七十猶有不得謝者焉卿懿文高行有君子之風清節令問爲當世所重閱書祕殿日侍清閑進讀經筵坐論道德固非有官司之責筋力之勞宜思少安副我眷待

鎮潼軍華陰縣雲臺觀修整真宗皇帝御容等殿今已了當扶請御容入本殿奉安祝文

十一月十四日

屹爾名山斯爲福地翼然寶構式奉威靈繕完既新

考卜惟吉暨茲懇至永以妥安

鎮潼軍華陰縣雲臺觀修整聖祖及真宗御容等殿今已了當乞請御容入本殿奉安青

詞十一月十四日

伏以靈峯甚峻仙宇載嚴爰考古辰奉寧真聖式伸祇告昭鑒乃誠

賜相州觀察使劉從廣進奉乾元節馬詔

卿蔚有敏材膺于寄任遠瞻壽節効乃誠勤在庭之獻肅陳事上之忠可見省閱之際嘉歎不忘

賜觀文殿大學士尚書戶部侍郎知定州龐

籍乞退不允詔

敕龐籍省所劄子奏以年齒衰殘自去年七月後累奉表及劄子輸漚懇誠尋蒙差知定州亦曾面告抵乞一年許賜請老歸第伏望早賜差人承替得遂前懇事具悉夫難進易退雖士節之甚美而尚賢優老亦朝家之所先故禮稱引年而有不得謝卿以雋德為時舊臣東於子秉任以方面材猷甚壯視聽方彊矧夫邊候無虞民事尤簡固可以偃息藩屏養頤精神而遠慕昔賢願還官政雖止足之意誠可尚於高懷而眷遇之深難遽從於來請所乞宜不允故茲詔

示想宜知悉冬寒鄉比平安好遣書指不多及

賜河陽三城節度使同中書門下平章事判

河南府文彥博辭加恩不允詔十一月

敕彥博省所上表陳讓裕享禮畢加恩事具悉朕屬者潔齊精誠薦見宗廟蒙神之貺受福孔多推慶賜以大行均中外而感及矧我同德乃時舊臣惟體貌之隆宜加於異數而褒優之意未稱於予衷嘉讓節之甚勤顧成命之難止所讓宜不允故茲詔示想宜知悉冬寒鄉比平安好遣書指不多及

賜樞密使檢校太尉同中書門下平章事宋

庠讓恩命第二表不允斷來章批答口宣
卿陪祀疇勞啓封加命再形懇讓深識冲懷顧定志
之弗移宜承命而毋忽

西太一宮開啓祝聖壽年交金錄道場青詞
十一月二十三日

伏以萬物堅成樂歲功之斯就四時迭運荷乾施之
無窮爰即靈場載啓科式薦以芬芳之潔通於杳默
之神伏願威鑒昭臨福禧穰集固穹隆之壽曆延絲
永之皇圖下逮羣生咸均餘祐

萬壽觀寧華殿開啓溫成皇后忌辰道場青

詞十一月二十九日

伏以妙道無方推平善應清真昭格通以明誠追內
則之有儀藹餘芳而未遠式臨諱日俾按醮科爰即
琳宮肅延羽士冀資冥福永助仙游

閣門賜許懷德張茂實告救口宣

卿素稱忠勇備著勞能俾更旄節之榮仍董緘緝之
旅徃膺寵命其體眷懷

賜觀文殿學士禮部尚書王與正乞致任不

允詔十一月二十九日

卿精深之學足以待問清懿之望足以鎮浮嚮從守

藩念遠賢之在外來侍經席冀開子於未聞惟道德之所資非耆舊而誰處雖引年之制禮固有常而愛老之心予寧敢怠所宜勉近醫藥輔安精補期臻壽康以副虛佇所乞宜不允

賜馬步軍副都指揮使張茂實赴闕生料口

宣十二月六日

卿遠趨召節方屆都城惟茲餼品之豐式舉彝章之舊徃祇寵錫式體眷懷

班荆館賜契丹賀正旦人使到闕御筵口宣

十二月九日

卿等歲元茲始隣好時修載馳使傳之勞方次都門之近宜伸頒錫式示眷懷

正月五日賜賀正旦人使內中酒果口宣

卿等夙將信聘來結隣歡方伸宴飫一作之豐式示眷懷之意芳醪嘉實宜厚寵頒

賜侍衛親軍馬軍副都指揮使張茂實讓恩

命不允詔十二月十五日

卿蔚有材武稱於周行早罄忠力膺予寄任自分齊鉞屢易名邦俾更節制之權入總禁嚴之旅扞城宿衛皆汝職焉載閱來章雖嘉讓節趨祇成命宜體眷

懷所讓宜不允

內中福寧殿開啓天慶節道場青詞

伏以新陽叶律肇正於歲端嘉節紀時蓋遵於國典
載嚴秘殿邀企上真薦茲蠲潔之誠香達清冥之應
冀承靈貺永祐皇圖

內中福寧殿罷散天慶節道場青詞

伏以元符肇貺先聖是膺紀為今節之名著乃仙科
之式用嚴禁密恭薦苾芬冀真馭之昭臨貺嘉祥而
茂集基圖永固動植均休

賜新除建雄軍節度使依舊殿前都指揮使

許懷德讓恩命第二表不允斷來章批答

月五日

省表具之卿拔從行伍之微董我師徒之衆嘉爾勞
舊優之寵榮乃思功效之未彰能形避讓之冲懇已
行之命其往欽承事上之忠無或怠忽所讓宜不允
仍斷來章

內中御侍已下賀皇帝年節詞語

妾等言伏以堯官謹曆萬物惟新夏數得天四時以
正恭惟尊號皇帝陛下睿明稟哲慈儉保邦正朔頒
行極舟車之所至仁恩一作溥及順天地以發生妾

等忝備掖庭獲瞻黼座順三微之首月祝萬壽於無疆

賜夏國主進奉賀正旦馬馳詔

王正首歲玉曆頒春眷惟繼世之忠克効守藩之職勤修時貢來旅明庭言念傾輸良深歎獎

皇帝回契丹皇帝賀正旦書

正月日伯大宋皇帝致書于姪大契丹聖文神武睿孝皇帝闕下歲端更始順陽律以布和信聘時修講隣歡而增固闕書言之勤好加筐幣之腆豐感戢所深述宣罔既今懷化軍節度使耶律嘏等回專奉書

陳謝不宣白

皇帝回契丹皇帝達皇太后賀正旦書

正月日伯大宋皇帝致書于姪大契丹聖文神武睿孝皇帝闕下玉曆頒時寶隣交聘兼馳使駟別枉信函載傳慈懿之言益固講修之好顯希侍次達此悰誠今歸德軍節度使耶律思寧等回專奉書陳謝不宣白

賜起居舍人知制誥劉敞等獎諭詔

敕劉敞省所進裕享詩事具悉裕大祭也禮久闕焉朕因時孟冬躬薦圭鬯永惟祖考之烈格于天地禮

樂之盛昭乎于一作物容宜有儒學之臣形為頌歎之
美卿議論閎博辭章爛然敷訓告以代予言是惟其
職發揄揚而稱上德聊見餘才省聞已還嘉尚良切
故茲獎諭想宜知悉

賜刑部郎中充天章閣待制錢象先等獎諭
詔十二月九日

敕象先省所進禘享詩事具悉禘大祭也禮久闕焉
朕因時孟冬躬薦圭鬯永惟祖考之烈格于天地禮
樂之盛昭乎子一作物容宜有儒學之臣形為頌歎之
美覽奏篇之來上慶熙事之有成文采可觀歎嘉于

再故茲獎諭想宜知悉

賜屯田員外郎國子監直講梅堯臣獎諭敕
書十二月九日

敕梅堯臣省所進禘享詩事具悉汝行懿而粹學優
而純以詩自名為衆所服矧乃詠祖宗之功德述禮
樂之聲容宜被朱紘以薦清廟載披來獻深用歎嘉
故茲獎諭想宜知悉

賜西京作坊使知麟州王慶民獎諭敕書二十

日
敕王慶民省所奏準密院劄子節文以臣撰成麟府

二州緝圖一面并序曰二冊詣闕上進事具悉古之用兵者必因地形制方略然後可以策勝敗之筭運奇正之謀爾以材武之資有敏明之識自膺東寄出守邊封而能周知山川險易之形歷覽亭障屯防之要列為凡目粲爾一作條陳不惟指掌於披圖足以因時而制變遷茲來上深體乃忠省閱以還歎嘉曷已故茲獎諭想宜知悉

集英殿告遷宣祖皇帝昭憲皇后御容赴奉先禪院慶基殿奉安祝文
伏以祖烈昭宣威神緬邈顧祠庭之風敬崇寶構以

載新冀即安永伸一作嚴奉

奉先禪院法堂上告遷宣祖皇帝昭憲皇后御容赴內中奉安祝文

伏以早嚴寶殿以佇神游今奉威靈即安清禁仰惟鑒格歆此精衷

景靈宮奉真殿開啓真宗皇帝忌辰道場看佛經都功德疏語

伏以威神在天奉真遊而時格覺慈宣化敷慧福以無窮追諱日之甫臨演秘言而申薦永繫仁佑式慰孝衷

景靈宮奉真殿真宗皇帝忌辰道場看道經
都功德疏語

伏以琳宮嚴啟奉真馭以來臨寶笈飛華演靈篇而
甚祕式屆遏音之日載深濡露之懷遐薦福園永資
道蔭

景靈宮廣孝殿章懿皇后忌辰道場看佛經
都功德疏語

伏以諱日斯臨孝心增感永慕至慈之德載瞻大覺
之雄既集善因遐資福果

景靈宮廣孝殿章懿皇后忌辰道場看道經

都功德疏語

伏以春露既濡孝思罔極即仙庭之祕邃誦金簡之
精微仰冀清真永資遐福

賜新除建雄軍節度使殿前都指揮使許懷
德讓恩命第一表不允批荅口宣

卿以宿衛之勤勞能備著俾移使節式示眷懷宜體
優恩勿持堅讓

賜新除建雄軍節度使殿前都指揮使許懷
德讓恩命第二表不允斷來章批荅口宣

卿夙推材武父擁節旄俾易名藩用仲優遇無煩固

避往服新恩

賜觀文殿學士尚書右丞田況乞致仕不允

批答 嘉祐五年正月八日

省表具之卿德量足以容衆材識足以濟時蔚然君子之風綽有大臣之體自嬰疾恙求解樞機朕心惻然深以為惜乃惟書殿之清職自非耆哲而弗居俾從優游以便頤養所期福善之理當蒙勿藥之休還來輔予以盡賢業遽形引謝良異眷懷所乞宜不允

皇第九女封福安公主制

五月二十四日

門下朕稽有國之彝章著皇女之稱謂取其主以同

姓所以見玉體之尊必也錫之美名所以彰禮命之寵載消吉日敷告在庭皇第九女岐嶷之姿有生知之異稟柔順之質得天性之自然方嚴保傳之規以養肅雍之德俾遵舊典褒以徽章嘉乃妙齡盛哉儀服考僉言而惟允非予意之敢私於戲隆仁恩以厚親茲惟教愛習圖史而循法繫乃夙成祇若訓言往膺渙渥命一作可封福安公主仍令所司擇日備禮册命王者施行

皇第十女封慶壽公主制

同日

門下詩紀王姬之盛車服之制甚嚴漢優帝女之儀

湯沐之封並列蓋敦國體匪曰親私惟始被於寵章
常推擇於嘉號載稽成憲誕告外庭皇第十女寶婺
分暉仙源襲慶大姿異稟溫而有儀姆教不煩生而
知善方居妙歲蔚有令猷朕仰承燕翼之謀茲膺一作
膺蕃衍之祉俾新禮命式示褒榮於戲寵秩既崇在
乎有德名稱甚美享乃多休祗服茂恩勿忘明訓可
封慶壽公主仍令所司擇日備禮冊命主者施行

內中御侍巳丁賀皇帝乾元節詞語

正月二十六日

妾等言正陽旅月式符誕聖之期令節稱觴共獻無
疆之壽伏惟尊號皇帝陛下法堯聰睿躬為儉勤

德浸於黎元至仁同於覆載舟車所及聲教咸均
茲率土之濱共効南山之祝妾等欣逢嘉會獲侍嚴
宸敢望清光恭陳善頌無任歌時樂聖歡呼激切之
至

內制集卷第七

在外嶽瀆等謝拾享禮畢祝文

神報

疑是仲報

內制集卷第八

歐陽文忠公集八十九

乾元節謝內中露香表

嘉祐五年五月二十六日

伏以清穹眷佑皇緒丕隆方陽月之正時屬誕辰而
著節仰瞻霄極薦此芬馨冀膺敷錫之祥永保延鴻
之慶

乾元節謝內中真宗皇帝表 同日

伏以佳名著節載誕紀辰永惟涼眇之躬獲荷顯休
之業動遵聖訓期保慶基怵惕之懷孝思罔極

乾元節謝內中章獻明肅皇太后章懿皇太

后章惠皇太后表 同日

伏以天陽正候壽節紀時深惟載育之恩緬慕至慈之德敢忘翼勵期保延鴻

賜樞密副使右諫議大夫張昇乞解罷第一

表不允批答 正月二十九日

省表具之朕惟一二左右之臣出納樞機之命必有同德為時老成卿質厚器閎材優識敏風力甚勁晚而不衰議論有稽言而必中朕所體貌民之具瞻豈宜退徇謙沖自厭繁務盡瘁事國矧惟素懷推心仰成當體予意所乞宜不允

除文彥博易鎮判夫名府制 二月十五日

門下朕惟將相之崇資是為文武之極選隆其名器所以重朝廷列于蕃宣所以屏王室矧乃居留之任必屬老成之人爰擇剛辰敷告有位具官文彥博器閎而厚識粹而明學得其方通古今而知要才周於物適大小以惟宜自奮發於聲猷早更揚於中外居則參裨乎國論出則宣暢乎皇威兩踐台司首當柄用賢愚式序舉百職以咸修綱紀甚明贊萬機而至悉自此一無懇避鈞衡之任出司管鑰之嚴逮此逾時蔚然休問眷言邦哲實簡予衷是用更其擁節之榮委以別京之重勁兵所宿實資總制之權雅俗惟淳

兼賴撫綏之政於戲與國同體是謂股肱之良惟民
具瞻方隆師尹之望顧我舊德豈煩訓辭往其欽哉
祇服休命可特授依前檢校太師同中書門下平章
事潞國公行陝州大都督府長史充保平軍節度使
判大名府兼北京留守司事充大名府路安撫使加
食邑七百戶食實封五百戶功臣散官勲封如故仍
放謝辭發赴本任主者施行

除李昭亮檢校太保判定州制 二月十五日

門下嚴師律以宣威是為將率之事謀王體而坐論
必屬廊廟之臣惟二柄之是兼蓋一時之首選顧於

寄任宜副倚毗爰告外庭式揚休命具官李昭亮資
質純厚器識通明世有勲庸蔚為舊德家傳韜畧濟
以美材爰自壯齡早膺獎擢訓齊士伍號令信於恩
威宿衛朝廷勤勞著於夙夜屢被蕃宣之寄實資鎮
撫之才惟留鑰之別都乃宿兵之重地歲時滋久譽
望益嘉眷言中山還爾舊治是用易以將旄之寵增
其帝傳之崇於戲宣國威靈用綏寧於邊鄙求民疾
苦以班布於教條俾無北顧之憂惟我老成之倚往
踐厥位時惟欽哉可特授檢校太傅依前同中書門
下平章事行兗州大都督府長史充奉寧軍節度使

充定州路都部署兼安撫使判定州加食邑七百戶
食實封三百戶功臣散官勲封如故仍放謝辭發赴
本任王者施行

除李端懿寧遠軍節度使知澶州制

同日

門下至治之時常不忘於武備用兵之要在先擇於
將臣禮樂詩書必資於學智信嚴勇又無以仁是惟
難才豈不慎選用詎一作剛日敷告外庭具官李端
懿器質宏深資識敏茂地聯近戚無富貴之驕世濟
美材躬儒素之行粵從壯歲綽有令名學問足以與
謀忠信可以事上而能克勵名節靡皇宴安每思報

國以有為嘗請治民而自効北州之政稱最東土之
人甚思惟留務之是居顧歷時而頗久俾加褒進爰
考僉同是用寵以節旄委之蕃翰於戲為政而先無
擾所以靖民除戎以戒不虞是宜有素繫乃通明之
畧副予東任之懷徃惟欽哉膺此休渥可特授依前
檢校刑部尚書充寧遠軍節度使知澶州加食邑七
百戶食實封二百戶散官勲封如故主者施行

賜禮部侍郎參知政事曾公亮乞罷不允詔

二月十八日

卿以敏識精學參贊萬務雋德茂行表儀百僚而思

慮之勞偶嬰疾恙藥石之効聞比康平嘉謀話言日以虛佇封章屢上引避甚堅豈未體於眷懷而每煩於開諭宜專輔養以副倚毗所乞宜不允

賜新除寧遠軍節度使李端懿讓志命第一

表不允斷來章批荅口宣

同日

卿聯國懿戚惟時美材久居留使之權俾委將旄之任載嘉冲挹思避寵榮宜體眷懷無煩牢讓

閣門賜新除寧遠軍節度使知澶州李端懿

告勅口宣

同日

卿也曹聯華資材甚茂早膺器使頗著聲猷俾進總

於中權式增榮於戚里所宜祇服以體眷懷

賜新除工部尚書知秦州張方平陳讓不允

詔三月十六日

卿識茂器闕智優學博施於有用謂靡不宜乃眷西陲最為重地惟撫綏備禦之任必通明敏給之才予難其人於爾為得委遇之意則惟其勤避讓之誠夫何于再勉祇其徃當體朕懷

賜樞密副使尚書禮部侍郎程戡乞退休第

三表不允批荅

三月十六日

省表其之朕惟朝廷之體廣大材賢一作賢材之士衆多

必有耆哲之臣以為時望之重卿早被獎擢藹然聲猷參聯鈞輔之崇協贊樞機之要履躬之懿久見於純誠事上之忠志期於盡瘁顧方深於毗賴而懇避於寵榮封章繼來敦諭亦至引年以禮雖嘉止足之賢優老虛懷未忘眷遇之意往安厥位宜體予衷所乞宜不允

大相國寺大殿上開啓為民祈福道場齋文

五月三日

伏以南薰被物方茲長育之明西覺稱雄允賴慈仁之濟俾延淨侶虔啓法筵冀迎百善之祥普洽萬生

之

賜宰臣富弼第二表乞退不允批答

五月十日

省表具之卿事君一心憂國百慮簡拔寒俊而多得遺才慎重賞刑而惟恐過舉蔚然德業方厚倚毗而網憲之司異同興論或事非大體或言涉難明因其摺撫於至微益見始終之無過雖開廣言路務在蕪容而進退大臣豈當緣此所宜篤卿自信之志成朕不惑之明渙然無疑來復厥位所乞宜不允

賜宰臣富弼乞退第四表不允斷來章手詔

五月二十四日

省四上表乞解機務事具悉朕力排讒構之言無採
措紳之望委卿以重任待之以不疑惟致治之至難
方同心而共濟勉以無怠庶幾有成而執法之臣以
言為職議既不一理難必從遂其好勝之私因於積
忿而發事緣藹一作昧語涉中傷遽罷憲司以釋群
惑雖朕之不明不敏既能為卿而辨之而卿亦何嫌
何疑遂將去朕而不顧避辭已確敢諭亦勤其體予
懷復安爾位使天下曉然知朕任賢而勿貳也所乞
宜不允仍斷來章付富弼

賜樞密副使張昇生日詔一作口宣五月十九日

卿以業履之清優任樞機之密勿余所禮遇時之具
瞻爰屆誕辰俾加慶賜

賜荆湖北路救濟飢民知州獎諭勅書五月

二十七日

夫修人事所以禦天災安吾民豈不在良吏爾學優
從政職任治人因凶歲之疫飢體詔書之隱惻既免
罹於殍饑仍不天於札瘥再惟敏事之林深得卹荒
之禮第課來上予心所嘉宜有褒章以旌善績

賜河陽三城節度使同中書門下平章事文
彥博進奉謝袷享加恩詔六月十七日

詩云君子邦之基記曰夫臣民之表子所寵異禮宜
優隆乃因祭福之均恩首效駿良而來獻載惟誠恪
深用歎嘉

賜定國軍節度使知并州梁適進奉謝恩馬

詔六月十七日

大鹵之雄中權為重時有舊老柬于予衷寵之旄鉞
之榮委以蕃宣之寄效駿良而來獻將誠慤之甚勤
省覽已還歎嘉曷已

賜觀文殿大學士知定州寵籍進奉謝恩馬

詔六月十七日

書殿之職號為清優舊德之臣所宜寵異乃求駿足
以副勤誠曾非貴物之心實體事君之節省閱于再
歎獎不忘

賜虔州觀察使定州路副都部署劉渙進奉

謝恩馬詔同日

國家慎選材武委之事權優其寵榮所以責効厚其
頒予所以養廉乃因物以達誠見事上之惟恪省閱
于再歎嘉不忘

賜定國軍節度使梁適進奉謝恩馬詔

卿惟時舊德為國將臣推恩典以既優俾家庭之增

寵乃輸良貢以効誠勤省閱以還歎嘉彌切

賜外任臣寮進奉賀禋享禮畢勅書六月十日

朕以孟冬卜吉大祭伸虔惟熙事之既成實庶邦之共慶載披來貢深見輸忠省閱以還歎嘉良切

賜翰林學士尚書兵部員外郎知制誥吳奎

乞知青州不允詔七月二十一日

卿強學博覽足以通古今嘉謀讜言足以承顧問朝夕獻納余有望焉矧方委之劇煩嬰以事任懋乃賢業宜有施於朝廷奮乎壯猷豈暇便於鄉里其安爾職深體眷懷

賜新除宣徽南院使檢校太保鄜延路馬步軍都部署經畧安撫使判延州程戡讓恩命

第一表不允斷來章批答八月八日

省表具之廼者卿數上封章懇辭樞要兼引年而為請思還政以自頤眷惟耆舊之英誠又劇繁之任俾增書殿之職仍參講席之聯是曰清優豈忘顧遇而進見之際聰明未衰廼遷使領之華徃重邊陲之寄予意所屬僉言允諧雖冲尚之可嘉惟成命之難止所讓宜不允仍斷來章

賜知建昌軍揚儀進奉銀珠稻米勅書八月

十六日

勸力農而務本惟汝之官登嘉穀以告豐乃時之瑞
粲然良實來効貢囊載惟修職之勤式緩憂民之意
省閱于再歎尚不忘

賜右諫議大夫知梓州呂居簡進奉乾元節
無量壽佛一幀勅書

同日

壽觴紀節罄率土以均歡妙像有儀獻無疆之善祝
嘉乃愛君之意見於事上之恭省閱以還歎嘉良切
賜新除翰林學士依前禮部郎中知制誥權
知開封府蔡襄上表乞依舊知泉州不允詔

八月十五日

卿學通古今足以備獻納政適寬猛足以臨劇煩而
得材之難顧常勞於選任矧居外茲久寧自逸於便
安是宜勉旃來服新命綽有餘力夫何微疾之辭居
然寵名固爲榮養之樂其毋必讓當體至懷

賜屯田員外郎王公衮獎諭勅書

嚮者長人之官備盜不謹害我命吏驚茲遠民汝於
斯時能奮厥効督捕甚急饋餉有方致茲兇徒卒就
擒戮第功來上覆實不虛載嘉勤勞深用褒歎

東太一宮立冬祝文

九月二十四日

四時適序萬物堅藏嘉歲事之有成繫神休之是賴
承茲靈貺報以吉蠲惟冀享誠益敷多祐

延福宮性智殿開啓皇后生辰道場齋文同日

伏以坤德流徽式臨於誕日具文宣妙恭仰於巨慈
載嚴祕邃之庭駟集清修之侶冀資壽福時啓靈場
伏願毫相分光法雲假蔭憑茲勝利永保遐齡

延福宮性智殿開啓皇后生辰道場密詞九

二十六日

伏以寒律正時適臨於良月曾沙誕慶爰紀於嘉辰
夙清祕殿之嚴並集祇園之侶冀因勝利延錫禧一作

休祥永輔坤儀益隆壽祝

故贈濮王允讓十月九日坼櫝祭文同日

日月惟吉山川旣佳啓茲攢塗往即襄事顧歆溥奠
宜體哀悰

故贈濮王允讓十月十八日起靈祭文同日

儀物旣備川塗甚夷往即佳城卜茲吉日靈其顧享
副此哀懷

故贈濮王允讓十月三十日下事祭文同日

惟靈稟德甚茂享年不遐余心所哀卹與斯備往即
安宅享茲克誠

撫問護葬使向傳式詔 同日

葬之為禮古所重焉方將事以在塗顧勞心於祗役
眷賴之意不忘于懷

撫問西京并汝州路祔葬隨護宗懿已下勅
書 同日

日月惟吉川塗匪遐顧襄事之有期嘉送終之盡禮
勞動備至眷矚良深

撫問尚宮沈氏勅書 同日

輜旌就道霜露戒時載惟將護之勞無怠祗勤之意
撫問西京并汝州路管勾修墳并沿路巡檢

道路及管勾一行靈舉程頓排辦等朝臣使
臣內臣等勅書

卜吉趨時送終備物顧風霜之方厲念事役之為勞
賜宰臣富弼上第一表乞解罷機務不允批

答

省表具之夫宰相之事非可以歲月考而一二數也
其在朝廷選賢任能而各得其職下俾民俗遷善遠
罪而不知其然至於法度修紀綱正然後相與慎守
而安行之以臻于治此朕所以虚心一意日有望於
卿者也今事有緒而卿辭焉豈朕德之不明將顧時

之不可中道而止夫何謂哉俾予獲用材不盡之譏而卿涉苟安自便之計予所不取卿其勉焉所乞宜不允

賜宰臣富弼上第三表乞解罷機務不允斷

來章批答

省表具之卿博通古今之學深達治亂之原德業之隆名稱甚盛朕方虛已而任不愧知人之明而自秉鈞衡宣勞夙夜惟是小大之政損益施設惟卿之爲罰罪賞功進退能否惟卿之聽時有異論豈無多言一切屏之惟卿之信若乃恭已南面庶幾輔予享其

成功登于至治亦惟卿之圖其三者人君之所難予罔敢忽其一者在卿之不止庶克有成而無名屢辭實所難諭卿其體茲至意究乃素懷所乞宜不允仍斷來章

內制集卷第八

內制集卷第八

三

除文彦博判大名府制自懇避一作自懇避而

賜李端懿讓恩命不允口宣俾委一作俾建

大相國寺為民祈福道場齋文之明一作之時

賜富弼乞退斷來章手詔議既不一一作既不當議

賜湖北救濟飢民知州獎諭勅書以禦一作以銷

表奏書啓四六集卷第一 歐陽文忠公集九十

諫院謝賜章服表同王素 慶曆三年九月

臣某等今日日準閣門告報奉聖旨來日改賜章服者臣等尋以列狀具言供職以來未有能效不敢即受乞賜停寢明日朝于垂拱退立庶下俟命不報方共彷徨未知進退而閣門吏已迫臣等入對及見于延和有司替使俯伏受命臣等不勝惶恐趨出以辭伏蒙遣中使宣諭云出自寒賤並不因臣僚薦舉不得辭讓臣等知君命甚寵不可必讓因退而拜受俯伏之際竦動羣臣伏惟陛下聖德仁慈優容臣下允

有上殿者多因事陳述自乞章服故陛下不因臣等奏事之時特召賜見又宣明命告以出自宸衷蓋不欲使臣等雷同徼幸之流而為外人譏議乃知陛下愛惜臣等至於如此臣等愛君憂國之勤自宜如何伏惟天地之恩無物可稱欲伸報謝惟有至誠今陛下以一章服賜臣等尚不欲令外人所斐伏况陛下上承社稷之重下制元元休戚之命舉動得失所繫者大則臣等固當事無大小一一規正致陛下纖過小失不見于外然後可以稱臣等報君之心如陛下所以愛惜臣等之意臣等無任

辭召試知制誥劄子慶曆三年十二月

臣今早準中書傳指揮令臣到聚廳處尋問得有聖旨令臣就試伏念臣自忝諫垣言事無狀日月未久恩渥已頻凡朝廷任用非人僥倖干進在於臣職皆所當言豈有自為僥倖以冒榮寵其召試指揮伏乞特賜追寢取進止

辭召試知制誥狀 同前

臣今日準中書召臣聞有聖語令臣就試已曾略具劄子辭免退而循省未止憂驚伏念臣本乏才能豈堪任用誤蒙聖獎擢在諫垣竊自思惟無以論報但

竭愚慮知無不為允姦邪在朝僥倖求進多以激訐
沽名未察臣心紛然議謂臣亦自省忠國之節特惟
陛下知之而可畏之言何由悉辨但誓不敢干進庶
幾久乃自明今若驟覓寵榮越次升用則是譏議者
謂臣向之所為果是沽激本非為國而去惡與務傾
人而進身不惟使今後朝廷擢用忠言之臣不以自
明而取信無恐小人見言者得進既速則各務奔趨
一長其風遂成媮弊蓋上干於國體非止徇於臣私
況臣供職未久言効無聞方今百度未脩四夷多事
言者正當以失職坐黜豈可以亡狀遽遷其召試之

命必望特賜追寢緣臣早來為中書催召倉卒之際
論述未詳謹再具狀奏聞

辭直除知制誥狀

同前

今日忽聞已有聖旨更不召試直除知制誥者伏以
聖恩優異至寵至榮臣所以敢茲懇請者蓋以上繫
朝廷任人之體非專臣子飾讓之私唯冀聖明察臣
悃福竊以朝廷進用臣下患忠邪不分欲辨忠邪須
覈情偽今一言事之臣得速進則小人好進紛紛事
以口舌為事至其甚弊理難抑絕則後來有讜言之

士必雷同以干進見疑使君子小人情偽何別故臣以謂任人之體惟言事者不可以速冒寵榮臣累得對便殿奏事之際常陳此說伏況臣供職已來日月未久幸值陛下切於求理優容直言然而夷狄未賓盜賊未息官吏未汰黎民未蘇以事考言其効安在而數月之內恩典頻仍當黜而升宜罰而賞繫於國體則如前所陳揣於臣私則自知若此且夫設官賦祿本以勸善擢臣一人好進者得以奔趨無勞者皆容忝冒所損已多伏望聖慈憫臣愚訥直降恩命特賜寢停

辭免第二狀 同前

昨以準中書劄子爲臣累辭恩命奉聖旨不得辭讓者伏以臣之事君有誠無飾若理必當受則豈敢虛辭上煩聖聰自陷矯詐蓋臣所陳述者上繫朝廷事體非獨專徇臣私如臣之愚本以言事者速進則僞言者誘以爭趨今若辭讓而不獲則僞讓者終於得進損之又損不如不辭臣猥以非材已在言責若陛下欲擢臣以責効則今所居之職自足展効但患無能若以寵典爲賞勞又無可賞伏況此來恩命特出聖心臣子至榮人所願得苟非深思熟慮理須避讓

豈敢固自稽遲以干典憲伏望聖慈察臣至誠至懇
所除誥勅早賜追還

舉呂溱自代狀 同前

准先降勅節文應兩省臺官尚書六品已上請司四
品已上授官訖具表讓一人自代於閣門投下方得
入謝者

右臣伏見著作郎直集賢院知蘇州呂溱首登辭科
素有文學不肯碌碌以希例進請補外郡躬勤政事
今蘇州治狀為兩浙第一臣嘗與溱同在館閣聞其
論議服其度量材美甚衆非臣所如擢以代臣庶允

公議謹具狀奏舉以聞

謝知制誥表 同前

臣某言伏奉制命蒙恩特授臣右正言知制誥者伏
以王者尊居萬民之上而誠意能與下通奄有四海
之大而惠澤得以徧及者得非號令告詔發揮而已
哉然其為言也質而不文則不足以行遠而昭聖謨
謀 作麗而不典則不足以示後而為世法居是職者
古難其人乃以愚臣而當此選臣某 中謝伏惟尊號
皇帝陛下茂仁聖之姿荷祖宗之業日慎一日曾未
少懈而自羌夷負固邊鄙用師勤儉率先於聖躬焦

勞常見於玉色雖有憂民之志而億姓未蘇雖有欲
治之心而群臣未副故每進一善則未嘗不欲勸天
下之能每官一賢則未始不欲盡人材之用雖以爵
祿而砥礪尚須訓誡之丁寧尤假能言以諭至意可
稱是者不又一作艱歟伏念臣雖以儒術進身本無
辭藝可取徒值嚮者時文之弊偶能獨守好古之勤
志欲去於雕華文反成於樸鄙本懼不適當世之用
敢期自結聖主之知陛下獎之特深用之太過此臣
所以懇讓三四至於辭窮而天意不回寵命難止尚
慮頑然之未諭更加使者以臨門恩出非常理難屢

念夫至艱孝者先乎善繼睿心遠紹振古與偕臣親
被上音適終論次慮失煩簡隕越待罪聖度兼貸錫
以褒言誓捐微軀仰荷鴻覆瞻望宸宸無任激切

謝賜慶曆五年曆日表

伏以聖人在上天地節陰陽和一日十二辰五星二
十八舍皆安次而行四時八風六律二十四氣各應
時而至臣愚幸同萬物俱被長育而得與草木自別
使知寒暑之期臣某中謝伏惟尊號皇帝陛下聰明
睿智天縱多能向因萬機之餘親考上元之曆以授
百職以同萬方而臣官任轉輸兼司按察苦乃加正

朔於四海頒政教於明堂陛下愬其要而舉其大端
至於經時節勸農桑候豐凶勤畜積順時令察姦非
則臣敢不守其職而行其小者庶無失業以荅洪恩
滁州謝上表慶曆五年十月

臣某言臣伏蒙聖恩授臣依前右正言知制誥知滁
州軍州事已於今月二十二日赴上訖者謗讒始作
大喧群口而可驚誣罔終明幸賴聖君之在上列職
尚叨於清近為邦仍竊於安閑祇荷恩榮惟知感涕
臣其中謝伏念臣生而孤苦少則賤貧同母之親惟
存一妹喪厥夫而無託携孤女以來歸張氏此時生

纔七歲臣媿無著龜前知之識不能逆料其長大所
為在人情難棄於路隅緣臣妹遂養於私室方今公
私嫁娶皆行姑舅婚姻况晟於臣宗已隔再從而張
非已出因謂無嫌乃一作未及笄遽令出適然其既

嫁五六年後相去數千里間不幸其人自為醜穢臣
之耳目不能接思慮不能知而言者及臣誠為非意
以至究窮於資產固已吹折於毫毛若以攻臣之人
惡臣之甚苟罹織過奚逭深文盖荷聖明之主張得
免羅織之冤枉然臣自蒙睿獎嘗列諫垣論議多及
於貴權指目不勝於怨怒若臣身不黜則攻者不休

苟令讒巧之愈多是速孤危於不保必欲為臣明辯
莫若付於獄官必欲措臣少安莫若置之閑處使其
脫風波而遠去避陷穽之危機雖臣善自為謀所欲
不過如此斯蓋尊號皇帝陛下推天地之賜廓日月
之明知臣幸逢主聖而敢危言憫臣不顧身微而當
眾怨始終愛惜委曲保全臣雖木石之心頑實知君
父之恩厚敢不虔遵明訓上體寬仁永堅不轉之心
更勵匪躬之節

賀章獻明肅章懿二皇后祔廟表

慶曆五年十月

臣脩言伏覩十月九日赦書章獻明肅皇后章懿皇

后祔廟禮畢者大孝發於宸衷刑于四海休氣蒸乎

美澤養及萬方華夏歡呼人

一作神

祇感

一作感

悅臣某

中實恭惟尊號皇帝陛下自天生德繼聖垂衣率勤

儉以在躬推仁恩而浹物動稽先訓謙弗自專奉二
后之慈靈永懷罔極詢百執之公議所據有經然後
肅清廟以載嚴由闕宮而升祔上儀交舉大慶咸均
孝思永奉於烝嘗懿範有光於典策臣守藩地近作
速受國恩深欣盛事之親逢與蒼生而共樂

賀祔廟禮畢進奉銀五百兩狀

右臣伏以廟容祔室一人式奉於孝思方物克庭萬

國率從於奔走前件物堅剛撻質粹美稱珍勉脩邦
貢之儀用罄臣忠之節

謝賜慶曆六年曆日表

祇膺寵錫伏積兢榮臣某伏惟尊號皇帝陛下愛人
育物精意奉天日用而百姓不知聖德與四時合序
是以星辰順軌日月清明陰陽和風雨節恭已南面
授人以時屬此歲端大頒玉曆臣職在守土愧無他
能謹守詔條其敢失墜

謝賜慶曆七年曆日表

臣脩言本州進奏院遞到詔書一道賜臣慶曆七年

曆日一本者天序方周王正肇建允爾守邦之吏皆
蒙頒曆之恩匪以為私蓋遵彝典臣某中謝伏惟尊
號皇帝陛下乾坤覆載日月照臨不言而四時行有
作而萬物覩而乃考覽氣象精窮天人著為玉曆之
文以叶明堂之政舟車所至正朔咸加雖被謫以窮
居亦以時而受賜臣敢不虔遵聖訓順布民時上副
欲治之心少逃曠官之責一作

慰申王薨表慶曆七年五月

臣某言臣得進奏院狀報五月二十三日以皇叔申
王德文薨皇帝幸後苑舉哀挂服者伏以申王德文

位崇王爵地重宗藩遠背明時奄然殂謝伏惟尊號
皇帝陛下仁親九族孝治萬方成服發哀恩隆禮備
臣忝居侍從遠守詔條不獲躬詣闕庭以伸奠慰臣
無任哀感之至

賀鴻慶宮成奉安三聖御容表

禮曆七年七月

臣脩言伏覩南京鴻慶宮成奉安三聖御容者一人
致孝式表於奉先三后在天並垂於鴻祐人靈交感
華夏歡呼臣某中賀伏惟尊號皇帝陛下以上聖之
姿撫重熙之運親執三弊禮天地之神祇時奉烝嘗
報祖宗之功德乃者別京之重載崇原廟之儀衣冠
出遊仰稽於故事郡國嘗幸俾得以奉祠實隆廣孝
之風以著不刊之典臣猥叨辭職方守郡條瞻盛禮
以阻陪效歡聲而徒切

謝加上騎都尉進封開國伯加食邑三百戶

表慶曆七年十二月

訓辭深厚恩典優隆祇服以還戰兢無錯臣某中謝
伏念臣朽非世用行與時違過蒙獎擢之私忝居侍
從之列坐尸厚祿安處善邦當見帝以親郊莫陪嚴
紆泪受釐而均慶亦被寵光進爵賜勲即封加尸併
茲榮數及迺無功敢不退自省循益思砥礪上答乾

坤之造更堅犬馬之誠

賀平貝州表慶曆八年閏正月

伏閏閏月一日攻下貝州殺到妖賊王則者盜孽竊
興人神一作祇共忿果憑睿筭悉殄兇徒臣其中賀伏
惟尊號皇帝陛下推仁育物浸澤在人常服一作克一作儉
以躬行惟足兵而在念至於多捐金幣講好戎夷務
休戰爭蓋惜士卒德至深而莫報恩既厚則生驕敢
肆妖狂自干斧鉞驅脅一作脅一作士眾閉守城闈既違天
而逆人宜不攻而自滅而况聖神運略將相協忠不
遺一人咸即大戮悖慢一作首警而肅恪一作肅恪一作昏愚者知

有誅夷銷沮茲萌震揚威令臣幸忝郡寄欣聞德音

揚州謝上表慶曆八年二月

臣脩言準樞密院遞到誥勅一道伏蒙聖恩授臣起
居舍人依前知制誥知揚州軍州事已於今月二十
二日赴任訖者貶所脫身遽叨臨於督府歲成無狀
仍敘進於官職被渥以優撫心增懼臣其中謝伏念
臣材非適用行輒違時徒知好古之勤自勵匪躬之
節誤蒙獎拔驟玷寵榮小器易盈固已宜於顛覆盡
言取禍仍多結於怨仇仰恃公朝臣雖自信在於物
理豈有不危矧利口之中人譬含沙之射影謂時之

衆嫉者易爲力謂事之陰昧者易爲誣上一作繫天聽之聰終辨獄辭之濫苟此寃之獲雪雖永棄以猶甘而況得善地以長人享及親之厚祿坐安優逸未久歲時亟就易於方州仍陟遷於秩序有以見聖君之意未嘗忘言事之臣孤拙獲全忠善者皆當感勵茲讒不効傾邪者可使息心非惟愚臣獨以爲幸此蓋伏遇尊號皇帝陛下乾坤覆載日月照臨察人常務於究情行賞必思於有勸致茲恩典施及懦庸誓堅終始之心少荅生成之造

穎州謝上表 皇祐元年三月十三日

臣脩言伏蒙聖恩就差臣知穎州軍州事臣已於三月十二日赴上訖者規求安閑坐享榮祿雖大君之德曲示含容而爲臣之心豈自遑處臣某中謝伏念臣材能淺薄性識昏蒙偶自弱齡粗知學古謂忠義可以事國名節可以榮身自蒙不次之恩亦冀非常之效然而進未有纖毫之益已不容於怨仇退未知補報之方遽先罹於衰病神與明而並耗風乘氣以交攻睛瞳雖存白黑纔辨蓋積憂而自損信處世之多危伏蒙尊號皇帝陛下造化陶鈞高明覆載閔其孤拙未即棄捐付以善邦俾從私便所冀療治有驗

瞻視復完則及物之仁荷更生之大賜使身不廢猶後效之可圖

謝轉禮部郎中表 皇祐元年四月

臣某言蒙恩授臣禮部郎中知制誥依舊知潁州者恩出非常榮逾始望人以臣爲寵臣以喜爲憂伏念臣自小無能惟知嗜學常慕古人而篤行不思今世之難行而自遭遇聖明驟蒙獎拔急於報國遂欲忘軀結怨仇者皆可畏之人所違忤者悉當權之士旣將行已又欲進身惟二者之難兼雖至愚而必達況臣粗知用捨頗識廉隅故其自被讒誣迨於降黜當

舉朝沸議未嘗以寸牘而自明及累歲謫居不敢以半辭而自理其後再經寬赦移鎮要藩曾未逾年遽求小郡蓋臣知難當之衆怒尚未甘心思苟免之善謀惟宜退迹則臣於榮進豈敢僥求此蓋皇帝陛下日月照臨乾坤覆載不忘舊物曲軫睿慈謂臣貶職之人悉皆牽復憫臣無名之罪久未雪除故推敘進之文特示甄收之意然臣近於去歲早已改官逮此便蕃豈宜叨竊欲固讓則有嫌疑之避欲遽受則懷忝冒之慙進退之間凌兢失措惟當盡節上報深恩

謝復龍圖閣直學士表 皇祐元年八月

臣脩言今月十八日樞密院遞到誥勅各一道伏蒙
聖恩授臣依前禮部郎中克龍圖閣直學士仍舊知
潁州者恩還舊職事雪前誣感極心驚涕隨言出臣
某中謝臣伏見前世材賢一作賢之士身結主知勲德
之臣功施王室然尚或一遭謗毀欲辨無由少忤要
權其禍不測顧如臣者何足道哉臣材不迨於中人
功無益於當世用之未見其効去之無足可思矧罔
極之讒交興而並進易危之迹何恃而不顛而聖心
不忘恩意特至辨罔欺於曖昧沮仇嫉於衆多雖暫
居譴謫之中而屢被陞遷之渥今又特蒙甄錄幸復

寵名以臣之愚豈比前人而獨異推其所幸蓋由聖
主之親逢謂宜如何可以論報再念臣稟生孤拙本
乏藝能徒因學古之勤粗識事君之節苟臨危效命
尚當不顧以奮身況爲善無傷何憚竭忠而報國誓
期盡瘁少荅高明

南京謝上表 皇祐二年七月

臣某言伏蒙聖恩就差臣知應天府兼南京留守司
事臣已於今月二十四日起上訖者守官鑰之謹嚴
敢忘夙夜布政條之纖悉上副憂勤寄任非堪兢營
並集臣某中謝伏念臣賦才庸薄稟數竒屯毀譽交

興兩嘗過實寵榮踰分動輒招尤念報效之未伸敢
不竭忠而盡瘁困風波之可畏則思遠去以深藏造
此六年外更三守學偷安而杜口負素志以媿心朽
質易衰已凋零於齒髮良時難得尚希慕於功名豈
謂皇慈未捐舊物擢從吏郡委以名都惟此別京舊
當孔道簿領少勤於職事厨傳取悅於路人苟循俗
吏之所爲雖能免過非有古人之大節未足報君

謝明堂覃恩轉官加勲表

皇祐二年十月

臣某言今月十三日進奏院遞到誥勅各一道伏蒙
聖恩授臣尚書吏部郎中加輕車都尉依前龍圖閣

直學士仍舊知應天府兼南京留守司事及放朝謝
者天地號令風雷鼓行一氣所均萬物咸被遂容僥
倖亦與褒升臣某中謝伏念臣材不逮人識非慮遠
徒有事君之節未知報國之方冒寵貪榮已踰其量
見利臨得曾不知慚此者伏遇尊號皇帝陛下堯舜
聰明禹湯勤儉脩前王之曠典述先志以繼成昭致
精裡躬臨路寢膺受上天之多福推與萬方而不私
臣於此時限以官守講儀制禮不預議郎博士之流
助祭陪祠不在諸侯方物之列既乏一言之獻又無
執事之勞徒隨翟闈共享餘賜曾天率土難異眾以

獨辭踏厚蹈高但撫躬而無措

表奏書啓四六集卷第一

紹熙三年十月承直郎丁朝佐編次

郡人孫謙益校正

辭召試知制誥劄子

干進

一作進

辭召試知制誥狀

不以自明

不字疑

辭免第二狀

所陳

獨專

一作專

表奏書啓四六集卷第二

歐陽文忠公集九十一

謝賜對衣狀

至和元年六月

右臣伏以粹然玉色方覲於清光賁以身章遽蒙於
寵賜授受之際兢懼交相伏念臣材靡及中器非周
用違光華之在旦荷榮祿以逾涯非惟罪謗之多罹
實亦禍罰之並至苟存遺體僅續餘生敢謂伏蒙尊
號皇帝陛下覆燾之恩幽微必及召從廬次復以官
聯當陛見之云初陳笥衣而有煥飾躬增耀愈彰不
稱之譏處物雖愚猶識謝生之所臣無任

辭翰林學士奏至和元年九月

臣今日準閣門告報蒙恩除臣翰林學士所降勅告
臣未敢祇受竊以內制之職選用非輕臣以庸虛繆
塵侍從歲月雖久能效無聞居外任不歷煩難在朝
廷未有補益見居學士之職已甚厚願豈敢更希榮
進況臣屯蹇之迹憂患所侵齒髮凋殘心志衰耗嚮
侍老母久纏疾恙尋丁憂制僅有餘生累歲以來學
業荒廢詔誥之任尤非所當欲望聖慈察臣衰拙所
有恩命特賜寢停臣無任

謝宣召入翰林狀

使車入里君命在門閭巷驚傳豈識朝廷之故事縉

紳竦歎以爲儒者之至榮在臣之愚何以堪此竊以

文章詞一作之任自古非輕待遇寵榮至有私人之日

詢謀獻納因加內相之名恩旣異於常倫人愈難於

稱職伏念臣器非宏遠識匪該明學不通古今之宜

材不識方圓之用久叨塵於侍從曾莫著於勞能而

自出守外藩近遭家禍苟存餘喘復齒周行風波流

落者十年天日再瞻於雙闕進對之際已蕭颯於霜

毛慰勞有加賜憫憐於玉色形神若此志意可知身

已分於早衰心敢萌於希進加以羈危之迹仇嫉交

攻進退動繫於群言論議多煩於睿聽雖覆載之造

每賜保全而孤蹇偷安常思引去敢謂伏蒙尊號皇
帝陛下俯憐舊物曲軫宸慈因內署之闕負俾備官
而承乏臣敢不勉尋舊學益勵前脩感遺替未棄之
仁竭駑馬已疲之力庶伸薄効少荅鴻恩

謝對衣金帶鞍轡馬狀 同前

右臣伏蒙聖慈以臣入院特賜衣一對金帶一條金
鍍銀鞍轡馬一疋若禁林促召彌峻於近班慈澤逾
涯復叨於蕃錫退循昧陋曷稱暉榮伏念臣素乏藝
文久塵清近神都繁浩常懼於曠官內署疑嚴遽叨
於廁職便蕃曲被兢慄方深豈謂載厚宸慈式垂寵

賚兼金錫帶榮踰廓落之名在笥頌衣媿甚曳屣之
刺輟以內閑之駿飾精寶校之光俯耀微軀仰慚殊
渥庸何疇補但誓糜捐臣無任

乞洪州劄子 嘉祐二年

臣去冬曾有奏陳乞差知洪州一次尋以差入貢院
無由再述懇私伏念臣本以庸愚叨塵恩寵一入禁
署迨今三年進無補於朝廷退自迫於衰病眼目昏
暗脚膝行步頗艱右臂疼痛舉動費力雖翰苑事無
繁劇聖恩曲賜優容然非養病尸居之地兼臣鄉里
在吉川昨於丁憂持服特歸葬亡母荒迷之中庶事

未備本期服闋還朝上告聖慈乞一近鄉州郡貴得
俸祿因便營緝而自叨禁職荏苒歲時貪寵忘親此
又人子之責也所以夙夜彷徨不能自止欲望聖慈
憫臣衰朽察臣懇迫特許差知洪州一次取進止

辭侍讀學上劄子嘉祐三年三月

臣準閣門告報伏蒙聖恩授臣兼侍讀學士臣伏見
侍讀之職最為清近自祖宗以來尤所慎選居其職
者常不過一兩人今經筵之臣一十四人而侍讀十
八可謂多矣臣以愚繆忝厠翰林又充史職太常禮
儀祕閣祕書省尚書禮部刊修唐書然則在臣不謂

無無職而經筵又不闕人忽沐聖慈特此除授蓋以
近年學士相承多無此職朝廷以為成例不惜推恩
比采外人議者皆云講筵件從人多無坐處矣每見
有除此職者則云學士俸薄朝廷與添請俸官以人
輕一至於此欲乞罷臣此命不使聖朝慎選之清職
遂同例授之冗負況臣材識淺薄自少以來粗習辭
章過蒙進擢俾塵禁署中年衰病常憂廢職至於講
說經義博聞彊記矧復非臣所長今耆舊之臣經術
之士並侍講讀者足以備顧問承清光欲望聖慈矜
臣不材自知俾免冒榮之誚所有告勅不敢祇受取

進止

再辭侍讀學士狀嘉祐三年三月

右臣準中書劄子以臣辭免侍讀學士恩命奉聖旨不許辭讓者伏念臣猥以庸虛過蒙獎擢禁署爲一時清選旣已忝竊經筵况近例多兼何必辭讓蓋以臣身見兼八職侍讀已有十人爲朝廷惜清職遂爲冗員沈講席不添人未至闕事所以敢陳瞽說乞免冒榮臣伏見國家近年以來恩濫官冗議者但知冗官之弊不思致弊之因蓋由冗所推恩便爲成例在上者稍欲裁減則恐人心之不足在下者旣皆習慣

因謂所得爲當然積少成多有加無損遂至不勝其弊莫知所以裁之中外之臣無有賢愚共知患此而臣爲陛下學士職號論思豈有目覩時弊心知可慮無所獻納而又自身蹈之今旣已陳述若又不自踐言則貪榮冒寵不止尋常之責而虛辭飾讓又爲矯僞之人此臣所以恐迫惶惑不自知止也伏望聖慈矜臣至懇察臣狂言許寢新恩俾安常分謹具狀奏聞伏候勅旨

辭開封府判子嘉祐三年六月

臣伏聞內出誥勅各一道付閣門除臣兼龍圖閣學

士權知開封府臣以庸拙久塵侍從初無勞效以伸
補報日夕循省常愧心顏今者曲蒙聖慈悞加選用
豈可苟避繁劇輒希辭免蓋臣有不得已者須至縷
陳臣自前歲已來累有奏列一作乞外任差遣蓋
以臣久患目疾年齒漸衰昏暗愈甚又自今年春末
忽得風眩昨於韓絳入學士院勅設日衆坐之中遽
然昏踣自後往往發動緣臣所修唐書已見次第所
以盤桓欲俟書成便乞補外豈期聖造委以治煩臣
素以文辭專學治民臨政既非所長加以早衰多病
精力不彊竊慮隳官敗事上誤聖知無所修唐書不

乞洪州第三狀

右臣近罄懇私自陳衰病願罷權尹乞一外州伏蒙
聖恩降詔不允臣以庸繆過叨獎擢不能陳力輒欲
辭勞當被刑誅敢期詔諭理宜祗惕明訓勉勵疲駑
而敢再干天聰固自愚執者蓋臣有不得已也臣舊
患兩目於今十年近日以來發作一作動尤甚眵淚浸
澁睛瞳眊昏視物稍多其痛如割欲頻請假告則浩
穰之地豈自遑安欲竭力枝梧則疾患內攻有難勉
彊夙夜憂畏不知所爲欲望聖慈憫臣衰殘察臣愚
拙許解繁劇假一遠外之州俾之待罪臣無任瞻天

祈恩激切之至謹具狀陳乞伏候勅旨

乞洪州第四劄子

臣近兩曾陳乞差知洪州一任未蒙恩許蓋以臣衰病不支難當任使素心所切苟欲便私非敢自圖外州以就優逸臣年雖五十三歲鬢鬚皓然兩目昏暗自丁憂服闋便患脚膝近又風氣攻注左臂疼痛舉動艱難一身四肢不病者有幾以此貪冒榮祿無處劇繁實知難濟矧自權行府事以來三致臺諫上言兩煩朝廷起獄其它碌碌常事亦無分寸可稱蓋其資材本自庸虛加以精神日漸耗竭處之清職則論

議謀猷無一可取擢以煩使又心力疲憊自訴不能上賴聖慈憐憫雖未欲遽棄于外而臣自處實所難安伏見侍從之班交相出入昨呂溱劉敞並請補外不三數歲今悉召歸況如臣者留之無所補去之無所惜者哉欲望聖慈矜臣此志乞一外任差遣得以養理衰殘誓於餘年少圖報效今取進止

辭轉給事中劄子嘉祐四年二月

臣近曾陳乞外任差遣伏蒙聖慈許臣解罷府事兼授臣給事中臣本以庸虛誤蒙獎任不能陳力況未及暮遽以衰病自求罷去理當黜責以勵不才豈宜

非時濫被恩賞況臣權府之初已蒙加以無職到今
才及半年有餘不因朝廷別有差使只是自以疾病
求罷豈可又轉一官雖聖恩優厚過寵衰殘而臣自
揣量無容濫受所有恩命乞賜停寢只許令臣歸院
供職所貴少安疲病今取進止

再辭轉給事中劄子同前

臣近準閣門告報蒙恩授臣給事中臣尋曾瀝懇乞
賜寢停今準中書劄子奉聖旨不許辭讓便令授告
勅者臣本庸材蒙陛下擢在翰苑言語侍從既無所
納以伸報效任以煩使又自陳疲病訖以不能然則

如臣久冒寵榮果堪何用上賴聖君優容未加黜責
豈可授命之日已蒙加職不久罷去又復轉官此臣
所以慙懼徊徨不敢即授也臣竊見前知府呂公弼
差知益州授樞密直學士及公弼辭免不行徙領郡
牧遂却只依舊克龍圖閣直學士王素蔡襄並因方
面之寄乃遷職是則罷府供職京師者不當別有遷
轉此近例也臣非敢飾僞上煩聖聰直以恩寵頻併
理當辭避欲望聖慈察臣無所堪用矜臣能自揣量
俾寢新恩免貽群議今取進止

舉呂公著自代狀同前

臣伏見司封員外郎崇文院檢討呂公著出自相門躬履儒行學贍文富器深識遠而靜默寡欲有古君子之風用之朝廷可抑浮俗置在左右必為名臣非惟臣所不如實當今難得之士臣今舉以自代

西之進新修唐書表

嘉祐五年七月戊戌為提舉編脩曾公亮作

臣公亮言竊惟唐有天下幾三百年其君臣行事之始終所以治亂興衰之迹與其典章制度之英宜其粲然著在簡冊而紀次無法詳略失中文采不明事實零落蓋有有五十年然後得以發揮幽昧補緝闕亡黜正偽謬克備一家之史以為萬代之傳成之至

難理若有待臣其中謝伏惟尊號皇帝陛下有虞舜之智而好問躬大禹之聖而克勤天下平和民物安樂而猶垂心積精以求治要日與鴻生舊學講論六經考覽前古以謂商周以來為國長久惟漢與唐不幸接乎五代表衰世之士氣力卑弱言淺意陋不足以起其文而使明君賢臣雋功偉烈與夫昏虐賊亂禍根罪首皆不足暴其善惡以動人耳目誠不可以垂勸戒示久遠甚可歎也乃因邇臣之有言適契上心之所閱於是刊脩官翰林學士臣歐陽脩端明殿學士臣宋祁與編脩官知制誥臣范鎮臣王疇集賢校

理臣宋敏求祕書丞臣呂夏卿著作佐郎臣劉義叟等並膺儒學之選悉發祕府之藏俾之討論共加刪定九十有七年成二百二十五卷其事則增於前其文則省於舊至於名篇著目有革有因立傳紀實或增或損義類九例皆有據依纖悉網條具載別錄臣公亮典司事領徒費日月誠不足以成大典稱明詔無任慙懼戰汗屏營之至

辭轉禮部侍郎劄子

嘉祐五年七月庚子

臣準閣門告報蒙恩除臣禮部侍郎令臣授告勅者臣伏思聖恩所及必以臣近進庶書了畢九與脩書

官並均睿澤竊緣臣與他脩書官不同檢會宋初范鎮到局各及一十七年王疇一十五年宋敏求呂夏卿劉義叟並各十年已上內列傳一百五十卷並是宋初一心刊修一部書中三分居二范鎮王疇呂夏卿劉義叟並從初置局便編纂故事分成卷草用功最多如臣者蓋自置局已十年後書欲有成始差入局接續殘零刊撰紀志六十卷是臣到局月日不多用功最少今來一例受賞臣實愧心無臣自嘉祐二年蒙恩轉諫議大夫三年蒙恩加龍圖閣學士四年蒙恩轉給事中到今方及一年豈可又一作以無功

濫賞臣不敢虛飾辭讓煩黷朝廷理有不安竇難自
默欲望聖慈特寢新命今取進止

再辭轉禮部侍郎狀

右臣今月二十二日奉被詔書一道以臣乞寢新除
禮部侍郎恩命不允事伏念臣出自孤寒累蒙獎擢
職忝學士官至給事中前後所授恩命不少豈敢頓
於此際過飾偽辭取好讓之虛名爲有識之所誚實
以臣撫心內愧不敢自欺蓋以唐書置局已十餘年
纂錄垂就臣最後至接續分撰卷數不多用功最少
不敢與從初置局及在局年深用功勤勞人一例受

賞所陳情實皆有據依不敢過言冀爲可信敢謂特
煩詔諭前例所無上體聖恩便合祇受而臣迫於懇
悃實所難安夙夜徊徨莫知所措若以臣雖無功效
不欲獨遺欲望聖慈稍加裁損或於階勲食邑一有
所霑俾臣得不過分足以爲榮臣若自欺不言則冒
寵雖多爲愧愈甚臣不勝激切戰懼屏營之至謹具
狀陳乞以聞伏候勅旨

賀壽星表

至和三年一
月誤雕在此

臣某等言天雖不言事以象見保祐聖德其社無疆
臣某等中賀伏惟尊號皇帝陛下以憂勞勤儉之志

躬自發憤而以仁慈寬厚之惠愛養元元下洎萬邦
小大諸物咸欲各正性命而畢安其生上天降監宜
有以報庚寅之夕星見南方占考天文福在人主惟
天去人不遠如此災祥在德可不戒哉臣等忝備詞
臣無所裨補惟願清心屏欲以隆南山之固而享有
夫無疆之休

乞洪州第五劄子嘉祐五年七月

臣猥以庸虛過蒙獎擢久列侍從訖無補報年齒老
大疾病侵陵聽重目昏聰明並耗髮白手顫精力俱
衰無以父母墳塋遠在江外未有得力子弟照管誠

心迫切臣自三四年來累曾陳乞一外任差遣中間
緣奉勅刊修唐書未見次第所以盤桓歲月不敢再
三望請今來唐書已得了當欲望聖慈差臣知洪州
一次所冀退養衰疎作拙無便私塋取進止

乞洪州第六狀嘉祐五年 月

右臣近瀝懇私上千睿聽以臣年衰多病父母墳墓
在遠無人照管乞一次江西差遣至今未蒙恩旨臣
以病攻于外一作事迫于中外一作既不自安實難緘
默將期得請不避煩言重念臣不幸少孤先父遠葬
鄉里在吉州之吉水昨臣丁母憂日又扶護歸葬然

臣方在憂禍故事力有所不周臣但仰天長號撫心
自誓祇期服闋便乞一江西差遣庶幾近便營緝至
於種植松柏置田招客蓋造屋宇刻稟碑碣之類事
雖倉卒冀於一二年間勉力可就當是時鄉人父老
親族故舊環列墓次並聞臣言自臣除服還朝皆引
頌望臣歸踐前約而臣遷延荏苒一住七年是臣欺
罔幽明貪戀其一作榮祿食言不信罪莫大焉無臣稟
賦竒薄衰羸多病兩目昏暗已踰十年近又兩耳重
聽如物閉塞前患左臂疼痛舉動無力今年以來又
患右手指節拘攣至於鬚鬢蕭颯一作條久已瞠然臣

自視形容如此不惟不宜濫廁賢材英雋之士出入
朝廷以取笑於搢紳之列實慮早衰易殞恐遂不得
一償素志以為終身之恨臣自數年以來雖累曾陳
乞而懇誠不至天聽未回亦嚮欲伺候唐書了畢今
者幸已成書上奏其餘所領並是尋常職務別無朝
廷差委勾當未了事件臣是敢罄述愚衷備盡微瑣
伏念臣本乏材能初無階接特蒙睿獎拔自常流置
在侍從殆今十有七年矣訖無補報孤負恩榮伏望
聖慈察臣心志凋零形骸朽悴閱臣昔當少壯銳意
立朝今而衰退一至於此哀臣情實迫切乞賜檢會

數年以來前後陳乞特許與除知洪州一次臣雖疲
憊猶能遵奉詔條修舉常職誓殫犬馬之力上酬天
地之仁臣無任徬徨激切謹具狀奏聞伏候勅旨

乞洪州第七狀同前

右臣奉被今月二十一日詔書一道以臣陳乞江西
差遣宜不允者伏念臣早以孤賤誤玷恩榮而生稟
拙艱動罹謗咎往自河北斥守滁陽在外十年遂至
白首頃除憂制還奉內朝幸蒙聖恩收以桑榆置之
翰苑凡今仕宦光寵孰不樂在朝廷職任清優顧亦
無出禁近臣豈不思嚮之流落引領欲一作還而乃

却蹈風波自投遠外此之愚計豈近人情蓋以臣事
迫心危有不得已凡諸懇悃嘗具剖陳不敢煩言况
已罄盡再念臣遭遇明聖過被恩私犬馬無知猶能
報效而臣性既踈簡識非敏明少以專學而自愚不
能趨世以濟務效當求實而安事虛名才貴適時而
一無可用至於上所詢訪時有論議亦碌碌隨衆人
未嘗有所建言縱令有之亦不足采惟有文字繆為
流俗過稱而自供職禁庭殆今七載屬中外無事文
書甚簡不過月赴四五直飽食甘寢止撰青詞齋文
一兩通只此為臣所能是臣事業去之亦何闕於事

存之又奚補於時將何以上煩睿慈曲示恩意特頒
詔諭前例所無捧讀驚慙繼以感涕臣亦竊聞近日
兩制臣寮多求外任彼皆材業有素年齒方彊又無
事於外方可以且留供職惟臣材無可用年又漸衰
外有私營冀償夙素欲望聖慈畀之一郡使其志畢
願從若天幸餘齡未填溝壑則遺簪舊物尚或冀於
見收而疲馬君軒豈不知於有戀臣無任祈恩激切
之至謹具狀陳乞以聞伏候勅旨

辭侍讀學士狀

嘉祐五年九月

右臣準閣門告報蒙恩除臣無侍讀學士者竊以學

士不宜無侍讀臣於前歲已具陳論當時蒙恩遂許
辭免在於今日豈宜復授得非以方今經筵闕人而
臣在學士中適當次補聖恩優異不忍獨遺臣以衰
殘久塵禁署已無龍圖閣學士而在院學士多未有
無職況臣前已有言理宜自踐欲乞許臣只無舊職
其經筵闕侍讀別賜除人所有誥勅臣不敢祇受今
取進止

辭樞密副使表

嘉祐五年十一月

臣某言伏奉制命蒙恩特授臣依前禮部侍郎克樞
密副使仍加食邑實封散官勲賜如故者成命始行

驟驚於衆聽撫心增懼曾莫以自容臣其中謝竊以
樞要之司朝廷慎選出納惟允實贊於萬機禮遇均
隆號稱於二府顧任人之得矣常繫國體一作之重輕
苟非其材所損不一伏念臣器能甚薄風力不強少
喜文辭殆浮華而少實晚勤古學終迂闊以自愚而
自遭逢盛明擢在侍從間嘗論天下之事言出而衆
怨已歸思欲報人主之知智短而萬分無補徒厝危
躬於禍咎每煩聖造之保全既不適用於時宜惟可置
之閑處故自叨還禁署逮此七年屢乞方州幾于十
請瀝愚誠而懇至被明詔之丁寧雖大度并包猥荷

優容之賜而群賢在列敢懷希進之心豈謂伏遇
號皇帝陛下急於求人思以濟治因柄臣之並選憐
舊物以不遺然而致遠之難力不勝者必速其覆量
材不可能自知者猶得爲明敢冀睿慈察其迫切俾
回渙渥更選雋良如此則器不假人各適賢愚之分
物皆知報何勝犬馬之心

謝樞密副使表

臣某言伏奉制命蒙恩特授臣依前官充樞密副使
尋具表陳免蒙降批答不允斷來章者右樞虛府充
位宜求於雋賢多士盈庭誤選乃先於庸妄旣牢辭

之靡獲徒以寵而為憂臣某中謝伏念臣少本賤愚
初無志慮為小人之事力不勝於負薪程有司之文
學止期於干祿過被仁恩之樂育早從英俊之並遊
遂叨侍從之流又玷論思之地方時求治殆無補於
毫分一作毫顧質早衰況漸凋於齒髮但思藏縮敢望
甄陞矧惟贊萬事之機必也極一時之選豈容濫得
猥以備員當命令之始行方惶惑以自失而睿恩至
渥召旨甚嚴莫諧懇避之誠徒負貪榮之媿此蓋伏
遇尊號皇帝陛下廓天地之量垂日月之光憐樸直
之無他謂疲駑之可勉俾承之以効拙勤臣敢不

奮勵無能之姿感激難逢之會職思其位庶免於曠
官謀不以身少期於報國

辭參知政事表嘉祐六年八月

職參論道宜極選於一時獲匪其人實駭聞於衆聽
恩榮所被跼踖難安臣某中謝伏念臣本之材能徒
緣幸會列于侍從白首無聞置在樞機素餐已甚雖
聖主之恩天地曲示含容而朝廷之事毫釐動關利
害豈止曠官之誚每懷誤國之憂矧惟政事之臣實
代天工之任俾之贊貳宜擇材賢伏望尊號皇帝陛
下收誤獎之恩廣僉諧之訪憫疲駑之已試備見無

庸求俊乂於在廷擢之不次俾獲安於舊職莫免速於罪辜報効之誠殫糜後已

謝參知政事表

贊貳國鈞參聞廟論謂宜不次而選冀得非常之材
廼以敘遷俾之承乏誤恩過被許讓靡從臣某中謝
伏念臣少迫賤貧偶勤學問儒者博而寡要況匪多
聞文章世之空言豈能適用徒以早適身嘉之會驟
蒙獎拔一作之私叨言語侍從之流逮今踰紀玷出
納樞機之任初乏可稱幸先彈理之未加每欲逡巡
而引去敢期睿眷俾與政機優以寵章進其爵秩望

非意及榮與憂并此蓋伏遇尊號皇帝陛下堯德聰
明禹躬勤儉博求俊乂以濟治康謂臣既朴且愚必
能循於忠謹雖庸而懦尚可策其疲駑猥以備負遂
茲冒寵臣敢不益堅素守自勉不強惟殫大馬之勞
上答乾坤之造

辭明堂加恩表

嘉祐七年九月

祭之為惠雖澤貴乎均而賞不因功則士無以勸既
難安於兢愧敢自避於黷煩臣某中謝伏念臣性本
顛愚學無師法才不適當世之用識不通治古之原
誤蒙聖知擢自平進俾參國論幸有蘊而得施坐耗

歲時訖無稱而取誚方懼素餐之責敢懷濫得之心
屬宗祀之有嚴奉精禋之致孝陪一二大臣之後既
竊窺於盛儀獻千萬歲壽之觴獲共慶於成禮然而
賜之胙餼蒙福已多加以寵榮在臣豈稱伏望尊號
皇帝陛下回高明之聽察懇至之誠推一人有慶之
恩賜先於幽遠憫小器易盈之量俾免於覆顛特收
渙汗之行仰冀曲全之造

謝賜飛白并賜宴詩狀

嘉祐八年正月

右臣去月二十七日伏蒙聖慈召赴天章閣觀太宗
真宗御集次赴寶文閣觀御飛白書賜以金花牋字

遂錫宴於群玉殿臣本出寒儒遭逢盛旦誤被獎擢
參贊鈞衡陛下憂勤萬機德被四海邊鄙不聳年穀
順成民物熙閑聖心怡豫臣於此際既得以尸素偷
安而又獲親侍清光便蕃恩錫一時之盛事千載之
難遇臣不勝至榮至幸謹課成召赴天章閣寶文閣
觀祖宗御集賜飛白羣玉殿賜宴五言八韻詩一首
隨狀上進干瀆宸嚴無任惶恐戰汗屏營之至

謝覃恩轉戶部侍郎表

嘉祐八年英宗
登極四月

皇明繼照如日之昇睿澤霽流溥天咸被時惟朽懦
亦玷光華臣某中謝伏念臣本以庸虛僅知學問識

不周於往行一作時材莫逮於中人方其壯年喜論時事名聲濫得招謗咎以偕來榮寵踰涯蹈憂危而亦至晚被先朝之誤獎俾陪二府之後塵居無補於休明方自期於引避遽號弓而結恨雖殞體以何追伏遇皇帝陛下奮發乾剛嗣承天統當茂業繼文之始乃歡謳歸啓之初宗社獲安人神洽一作合慶矧惟新之號令方無間於幽遐顧於茲時其敢獨異俯從祗受但益凌兢敢不勉勵衰殘感遇今昔更竭疲駑之效庶伸塵露之微

謝皇太后表

嗣聖當天法重離而正位鴻恩浹物均萬國以同休遂容尸素之臣猥被優隆之渥臣某中謝伏念臣名雖學古性實迂儒徒誦習於典墳靡該通於今古爰從東髮遭會明時蒙先帝之誤知與羣英而並進紫樞黃閣叨陪論道之司白首丹心徒有報君之志屬綴衣之揚命奉主鬯以承祧方推慶賜之行遽荷便蕃之寵伏遇皇太后殿下坤元厚載母道居尊惟茲聽覽之初務需汪洋之澤臣敢不勉脩職業上副憂勤迭往事居忘身盡節庶展涓埃之效少酬覆燾之私

表奏書啓四六集卷第二

紹熙三年十月承直郎丁朝佐編次

郡人孫謙益校正

謝對衣金帶鞍馬狀促召一作祇召

辭待讀學士劄子朝廷與添請俸一作廷二字

進新修唐書表百有五十此上一字萬代一作萬世平和一作

不幸此上一字不足暴其一作足得

辭轉禮部侍郎劄子六十卷此上一字

賀壽星表英辭類豪題作中書賀壽星表故其後

乞洪州第六狀刻稟一作事雖難疑是

乞洪州第七狀隨眾人象字

辭樞密副使表殆淳華一作第晚勤古學一作志禍咎一作

悔優容之賜賜德

謝樞密副使表雋賢一作良以寵而為憂一作為憂寵早

從一作從參極一作極副樸直一作忠直少期一作少

謝參知政事表俾之一作任

此卷謝賜對衣狀云授受之際廣韻受字上聲納也承也盛也得也繼也授字去聲付也公之它文

或以授爲受以受爲授蓋一時玄用不可輕改
此卷謝賜衣帶鞍馬狀乃初入翰苑時其云神都
繁浩者謂前任南都留守也或疑解開封府之後
誤矣

廣韻以謬爲差誤繆爲紕繆皆非美意此卷辭翰
林學士奏云繆塵侍從乞洪州第三狀云臣以庸
繆修唐書表云黜正僞謬并集古跋真蹟凡言訛
謬盡用繆字可見玄用之意元文不可輕改

按兩朝國史至和三年二月辛卯壽星見止卷賀
表云庚寅之夕蓋陰陽家分亥子爲兩日又太史

例以次日奏故史書辛卯正應表文吉本作臣等
忝備詞臣乃與翰苑同僚共上表也英辭類彙題
云中書賀表改詞臣爲宰臣雖故事舍人當作詳
注纂誤然慶曆四年春公知制誥時初無此祥當
以吉本爲正

表奏書啓四六集卷第三 歐陽文忠公集九十二

辭特轉吏部侍郎表

治平元年閏五月

受寵若驚況被非常之命事若無隱敢傾至懇之誠
仰竊高明唯知跼蹐臣某中謝伏念臣性姿庸近識
局昏冥學古自愚非有適時之用論材甚薄豈堪任
重之難徒以荷先帝之誤知自孤生而拔擢犬馬未
報但虞填壑之有時弓劔忽遺遽歎攀髯之莫及而
屬皇明繼照聖治惟新送往事居雖策疲駑而自勵
進思退補未知罪戾之所逃至於貪踰分之寵榮冀
無功之爵賞非惟愚慮所不敢及顧有公議其將謂

何而甫茲彌年再以增秩方命書之始下駭群聽以
生疑此臣所以剖瀝肺肝不能自止彷徨夙夜莫獲
偷安伏望皇帝陛下回日月之餘光廓乾坤之大度
察其悃悞一作假以矜寬雖成命已行國體當嚴於
出今而從人之欲天高幸或於聽卑特收渙汗之恩
以息誼譁之論庶安常業誓畢愚衷

再辭轉官第一劄子

臣此者伏蒙聖恩特除臣吏部侍郎依舊居職臣早
來獲對天顏雖略具陳述退而循省未盡懇誠伏乞
臣本以常材誤蒙任使問其所職則皆朝廷之大事

較其成効則無尺寸之可稱外惟碌碌以隨人內則
區區而自守當陛下聖政惟新之始勵精求治之時
雖天度包容未加斥罷而臣心自揣常負驚憂豈謂
宜黜而升當責而賞非惟臣自知不可顧於物論其
謂如何況自去年陛下即位之初均慶之典臣已首
叨遷秩今來恩命實出非常在臣之愚難以自處欲
望聖慈矜察特賜寢停今取進止

第二劄子

臣今日伏蒙聖慈差中使傳宣令於後殿告謝臣與
趙槩等遂詣垂拱殿門請對欲再具敷陳續奉聖旨

須管便受告勅臣以聖駕已起君命甚嚴惶惑之間
不知所措雖已受告勅尋於延和殿得對已曾瀝懇
備述聖恩非次義實難安蓋以無功受賞者衆以為
非若竊事為功則罪又大矣伏以陛下承先帝已定
之命入繼大統此天人之意也而即位之始偶因過
哀致違和裕既而勿藥有喜聖躬清寧蓋由宗社神
靈顯此異事欲彰皇天眷祐陛下使不由人力而致
康復而臣今乃貪以為功坐獲厚賞臣所謂於義
難安者也至於陛下未親庶政之間中外幸得無事
此有宋百年四聖相繼威德在人顧臣等輩有何施

設過蒙睿獎以此疇勞況臣猥以庸材參聞國政上
所賞罰臣職奉行若羣臣之間有功狀不明迹涉僥
倖尚當裁抑以絕濫恩而臣乃自貪寵榮以速議論
此臣所以區區不能自已也故聖恩雖極優異而臣
不免屢瀆天聽一作聰伏乞早回聖斷追寢成命俾臣
獲安常分以息羣言今取進止

第三劄子

臣今日伏蒙聖慈差入內高品陳日新至中書傳宣
令臣繫新除官臣尋與曾公亮等具劄子奏乞候來
日覆奏伏緣此來恩命出於非常臣與韓琦等進退

惶懼夙夜思惟雖君恩至優違則有咎然事體所繫
義有難安所恃者睿聖聰明必察臣等懇誠之至聖
心寬恕不以臣等屢黷爲煩欲望天慈省閱臣等前
後所陳事理曲加裁擇特賜寢停免於此四方旱灾
百姓嗷嗷之際是臣等合被責之時濫受非次之賞
則臣不勝幸甚臣誠迫意切言不成文干冒冕旒伏
俟誅戮今取進止

謝特轉吏部侍郎表

驟膺渙渥備瀝愚誠雖至辭窮罔避煩言之爲黷重
乎今出莫回成命於已行祇受以還驚一作惶失節

臣其中謝伏念臣學不通於元本材不足以經綸但
知守拙以爲忠每務師心而自信徒以遭逢先帝拔
自衆人久參侍從之聯遂玷機衡之貳而屬大橫啓
兆嗣統膺期方初政之清明思百度之脩理內量謙
薄實憂以聖而責愚矧迫衰殘方念乞身而告病不
謂皇慈曲被寵數屢加當覃大慶之初已無功而冒
賞曾未踰年之久復進秩以叨榮此蓋伏遇皇帝陛
下聖政惟新用人務廣謂才難於求備思悅使以忘
勞憫其勤劬錫以優洽雖榮踰於望表亦寵與其憂
并誓殫犬馬之微少答乾坤之造

乞外任第一表

治平二年正月二十三日批答不允

臣某言臣聞事君以忠本期盡瘁不能者止亦貴目知敢傾悃幅之誠仰瀆高明之聽臣其中謝失念臣本由寒素偶踐科場祇希干祿以養親敢冀逢時而見用蓋以腐儒章句之學豈堪王佐之材童子雕篆之文固異賢人之事而誤蒙睿獎俾貳宰司訖無豪髮之可稱常懼滿盈之必覆加以年齡迫於衰晚氣血損於憂傷惟兩目之舊昏自去秋而漸劇精明暗藹瞻視茫洋冬春以來職業多廢當聖君求治之始是群臣宣力之時自嗟犬馬之微生遽先疲乏惟恃

乾坤之大度曲賜含容雖未責於曠官亦難安於尸祿與其坐待於彈劾豈如自乞於哀憐伏望推天地之恩回日月之照察其愚直不敢矯誣許辭政事之名假以州符之寄則臣不止偷安而養拙亦將自療以求痊尚冀昏瞳之復明會圖後効而論報

第一劄子

臣所有誠懇昨日獲對便坐已具敷述蓋臣自去年八月喪一女子凡庶常情不免悲苦因此發動十年來久患眼疾又爲老年全服涼藥不得自深冬已來氣暈昏澁視物艱難接此春旱陽氣上攻遂至大段

妨事然臣愚心祇欲俟壽聖節隨班上壽一展臣子之誠以爲榮幸然後懇求罷去所以勉彊遷延至今緣此是臣私故瑣屑雖臣子之於君父理當無隱然難委曲盡載表章所以先具奏陳冀蒙省察臣以非才過蒙任用使其聰明彊健猶懼不能稱職況此衰病何以堪處昨日雖面奉聖旨令且未要入文字蓋臣迫於情懇退不自安今已具表陳乞伏望聖慈哀許今取進止

第二表

正月二十六日
十九日批答不允

臣某言臣近貢封章乞解政事伏奉批答不允者天

甚仁而溥愛人有欲而必從苟睿聽之未回由懇誠之不至敢干斧鉞再瀝肺肝臣某中謝伏念臣學不通經材非適用徒以遭逢亨會進冒寵榮一玷機衡五遷歲律伏遇皇帝陛下握圖撫運嗣統當天覽決萬事則堯舜之聰明愛養群生則禹湯之勤儉賢材並進聖治惟新臣於此時得與大政何脩何飾而可以稱職旅進旅退而莫知所爲已慚廊廟之訐謨既無遠略惟有簿書之瑣屑尚可宣勞而苦此雙瞳莫能久視眊然終日兀爾尸居上無以副人主之憂勤下無以伸臣子之報效久而不去罪則奚逃此臣所

以夙夕彷徨難安自默者也伏望皇帝陛下曲回天
聽少軫皇慈念臣日侍冕旒察臣心非木石祿位者
人情之所顧惜孰肯妄辭筋骸者物理之有盛衰不
能無之哀其可憫寬以不誅俾諧得請之恩當識謝
生之所

第二劄子

臣受國厚恩叨與機政材識庸下不能有所補報上
賴聖君含垢未即斥去而又不思勉彊竭力以脩職
業輒以衰疾自陳欲圖安便重煩聖念持降中使傳
宣賜以訓誨丁寧切至而又頑然未即聽從在臣之

罪可誅者非一臣以方具表陳乞理當闔門俟命不
得進見闕庭面陳悃悃臣聞自古君臣去就之際與
今不同蓋昔之公卿解職便歸田里其朝居君側暮
已絕於朝廷所以臣重去其君君亦難其臣之去然
猶去者相繼今則不然凡辭職任者皆不去祿仕或
優游侍從之班或出守藩要之地豈為避寵辭榮乃
是免勞就逸實人臣之僥倖也况如臣者尸祿終日
無勞可均實以兩目俱昏是十年舊疾自去秋發動
日益昏澁看讀文字艱難憂慮職事曠廢有悞國家
所以敢布懇誠乞憐君父冀一閑僻處將養三二年

或日復清明却乞一邊遠繁難處展効乃是臣自爲
僥倖之計與辭榮避寵者不同欲望聖慈不以爲難
早賜恩許今取進止

第三表

正月二十九日
上二日批答不允

臣某言近上表章乞解政事伏蒙聖慈再降批答不
允者臣聞事君以忠信爲本立朝以進退爲難惟不
自疑乃能取信於上苟無大過度幾善退其身昔之
爲臣全此者少今臣遇聰明之聖主固不自疑苟好
庇之寬仁幸無大過是以敢因疾病直露情誠而封
章屢陳俞旨未賜臣竊謂日月之明無不照豈不諒

臣之乃心得非天地之恩有所憐未忍許臣之遽去
在臣自揣何以克堪豈合更此多言上煩宸聽所難
遂默蓋切懇私臣某中謝伏念臣以中下之才被非
常之任日諧進見則蒙眷待之優隆退接同寮則絕
纖毫之間隙自可安然樂職亦復何所憂危況千載
一遇者盛時之難逢高秩厚祿者常情之貪得苟非
迫於衰病豈敢固自欺誣伏望皇帝陛下曲軫睿慈
俯哀愚款念其蒲柳質易朽而先衰譬若馬牛力已
疲而則止賜其如請恕以苟安則臣刮膜祛昏尚冀
清明之來復捐軀殞命終圖報效於餘生

爲雨水爲火待罪乞避位第一表

治平二年八月

臣某言臣聞任非其人則官必曠職時多闕政則天爲降災惟譴咎之有歸難僥倖於獨免臣某中謝伏念臣本以庸妄遭逢盛明擢貳宰司與聞國論不能叶宣上德輔導至和頻年已來害氣交作春飢已甚饑疫相望秋潦暴興覆溺無數下致生民之愁苦上貽聖主之焦勞臣獨何心安於厥位舉朝廷之典法便合黜幽賴覆燾之寬仁尚容自劾伏望皇帝陛下特回天造俯察愚忠俾解政機推行憲罰以塞上穹之降責以警庶位之脩官然後別選雋賢俾居參輔

益圖更化之術上副求治之心自天人神以和災異咸弭不惟臣適其分亦俾國無屈刑

第二表

臣某言近以雨水之變上表待罪蒙降批答不允者上天告戒比屋罹災虔思消異之方願避進賢之路特迂聖訓未諒愚誠退自省循豈遑安處臣其中謝伏以天人之相去不遠見於事者若響之應聲賞罰之至要易知舉其大則以一而警百是以政有得而有失則災祥以類而來官若成而若虧則黜陟以時而舉伏念臣猥由愚陋進冒寵榮一貳政機五更歲

律相府之事無不揔既皆得以與聞斯人之居不聊生欲於何而歸咎辜朝廷之委任貽君父之憂勞此而不誅何以勵衆伏望皇帝陛下奮然睿斷赫以皇明理其曠敗之愆正厥經常之法置之散地全以寬恩誓堅犬馬之心終效涓埃之報

第三表

臣某言近以雨水之災再上表待罪蒙降批答不允仍斷來章者陰沴干時聖心軫慮明詔一下群臣震惶況居任責之司敢爲幸免之計臣某中謝伏惟皇帝陛下自膺眷命光紹丕圖揔覽萬機之繁講求三

代之治吁不遑食勵文王之小心行之以勤躬伯禹之盛德固已生民受賜品彙蒙休宜召至和以來嘉應而善氣未效時災荐臻惟天聰明異不虛出示人警戒咎必有歸所以三事之臣連章瀝懇况臣最爲濫竊尤玷寵榮方平日以尸居不知引分及敗官而宜罰其敢逃刑伏望皇帝陛下俯抑至慈深思大譴退其不肖以爲脩政之先不以空文庶得應天之實

再乞外任第一表

治平三年三月二十四日
上批答不允

臣聞忠以事上雖見義而必爲力有不能則知難而當止是惟臣子進退之分寔繫國家利害之機則其

居也敢懷竊位之安其去也豈止全身之計輒殫拙
訥上瀆高明臣某中謝伏念臣本以庸妄出於孤平
一作學不通方識非慮遠徒以遭逢先帝誤被聖知
擢自諸生俾參大政伏遇皇帝陛下膺期出震繼統
當天方聖政之惟新思群材而並濟臣以衰遲之朽
質久當機要以妨賢有守經泥古之愚無應變適時
之用考於外論早合黜幽伏蒙皇帝陛下廓大度以
兼容謂衆惡者一作必察特加庇覆俾獲保全固當
勉勵疲駑誓圖報效而臣量盈器極福過災生兩目
眊昏積年舊若中消渴涸新歲所加精液銷斯志與

神而並耗革膚腠削氣將力以俱殫臣若猶彊殘骸
竊貪厚祿坐取敗官之責上累知人之明苟以此致
興於人言則乃是可畏之公議異夫誣謗難復主張
此臣所以深自揣思敢陳悃迫一作伏望皇帝陛下
曲回睿眷俯察愚忠念其獲親日月之光頗歷歲時
之久居常碌碌曾莫異於片言一有紛紛遂獨當於
衆怒尚乏周身之智豈堪爲國之謀因其自訴於病
衰幸俾獲逃於罪戾退之散地得盡餘齡則臣永荷
天地之恩敢忘犬馬之報

乞出第一劄子

臣昨日獲對便坐輒述懇私乞解政事之任緣臣疾
患累日氣血虛乏頭目昏眩不能久立不得久侍天
顏悉陳悃悃伏自濮園之議既興言事之臣荒唐不
學妄執違經非禮無稽之說耻於不用不勝其忿遂
厚誣朝廷借以一作為名因乃一作肆言訕上指臣
為姦邪首議之人陛下至聖至明洞見中書與兩制
所議本未察臣無罪曲賜保全而呂誨等附下同上
語言悖慢無復君臣之禮以至斥黷毋后非毀詔書
等事陛下皆屈意含容不加顯戮止於退罷而已及
詔定濮王典禮不如誨等所誣既又詔榜朝堂諭以

本末由是中外釋然凡素為誨等誣誑銜惑之人皆
識朝廷本意但恨曉諭之晚今則是非已正曲直已
分臣所被誣亦已獲雪然則更何所辨豈合有言而
臣義有不得已者蓋以執政之臣天下之所瞻望朝
廷以為重輕若其名譽烜赫非止一人之榮乃是朝
廷之光也其或身名毀辱非止一人之辱乃是朝廷
之辱也昔唐文宗甘露事後小人用事宰相李石為
其所惡乃遣盜殺之不中而斷石馬尾石遂求罷文
宗雖知石賢相可惜亦不得已而罷石為荆南節度
使蓋顧國體當爾也今臣固無李石可惜之賢而其

所被毀辱者何止斷馬尾而已呂誨等連章累疏惡言醜詆陛下爲臣愛惜留中而不出誨等自寫章疏宣布中外今閭巷之人皆能傳誦雖誨等急於賣直取名肆其誣罔不暇惜國體而自爲傳播如臣者豈合彊顏忍耻猶安厥位使天下何所瞻望凡臣所貪以爲榮者乃朝廷之辱也由是言之臣豈得已哉使臣無疾病猶當懇自一作引去況臣不幸適值自春來瘠渴不止昨日面奉德音陛下悉已知臣所蓄聖恩憫恤爲之惻然伏望陛下特賜除臣近京一郡俾養衰殘則臣未死之間誓當別圖報効今取獲止

第二表

三月二十八日 批答不允

臣近貢封章願還政事伏蒙聖慈特降批荅不允者臣聞愚誠雖微而苟至可以動天大仁博愛而無私未嘗違物敢殫懇悃再冒誅夷臣其中謝伏念臣智識非精器能甚淺稟生竒薄自少嘗履於艱虞雖處困窮所守粗知於名節而自早蒙擢用思奮猷爲不善自謀遂致怨仇之積罔知避禍屢觸陷穽之機先皇帝深察孤忠悉排群議甄收獎進終始保全以至晚年致之二府念初無於報効徒久玷於恩榮逮逢神聖之嗣興顧已歲時之三易問其職業曾無補於

毫分聽於誼譁則不勝於詆辱猶彊疋殘之質坐懷
寵祿之貪昔一作云高位之疾顛何況千人之所指
繼以恙痾之苦茶然氣血之衰藥石之功既難求於
速効機政之地豈宜久於曠官伏望皇帝陛下曲軫
睿慈俯哀危懇謂獻納訏謨之任已無益於明時而
沮傷憔悴之餘寔難安於久處許其引避寬以優容
儻後來因此以得賢則臣去猶爲於有補苟未填於
溝壑誓終竭於涓埃

第二劄子

臣近再述懇誠上干天聽乞解重任伏蒙聖慈特降

批答丁寧訓誨未賜允俞臣本庸材不堪大用遭逢
聖主誤被獎知陛下急於求治取信輔弼言無不從
臣於此時不謂不得君不謂不得位而智識駑下初
無補報既不能建明太義鎮遏群言又不能和會衆
心叶于一德遂致浮詞異論中外誼譁惟務含胡無
一言以辨正但欲因循苟於無事以此養成群小誣
謗聖朝上則煩黷睿聰下則自取身辱雖陛下閔臣
拙直衆怒獨當察臣暗愚不識陷穽然臣拙於謀身
不堪任用已驗如此可默不疑陛下聖度寬仁曲加
保庇以爲箝履舊物不忍一旦棄捐然臣夙夜彷徨

不能安於自處者蓋以朝廷輕重繫在大臣若大臣
望重則朝廷尊大臣望輕則朝廷不重大臣望輕猶
爲不可何況惡言醜詆毀辱百端今豺狼當路姦邪
在朝之語下傳閭巷外播四夷以是而言何止望輕
而已陛下有臣如此豈不爲朝廷之辱哉雖陛下至
聖至明察臣無過臣能自信無愧於心而中外之人
不可家至而戶曉百辟之瞻望衆人之譏誚臣亦何
顏以處之與其負慙俛首以見縉紳孰若乞身遠去
少避指目是則聖恩許臣解罷俾臣稍獲便安爲是
臣居位也以榮爲辱其去也以黜爲升惟望天慈曲

從人欲今臣已上第二表伏望聖慈曲從人欲除臣
蔡亳一州差遣

第三表

四月初四日上初七日
批荅不允斷來章

臣近以疾患自陳乞解重任伏蒙聖慈再降批荅不
允者坐貪國寵旣以難安仰叫帝閭期於必達臣某
中謝伏念臣早緣幸會親遘休辰以一經之腐儒參
萬機之密論違時背俗速謗招尤雖無獨立弗懼之
明粗懷可殺不辱之節所以彊顏忍耻不知軒冕之
榮加之多病久衰難勝筋力之任近從去歲益以中
乾渴如鼯鼠之飲河喘若吳牛之見月多言外噪衆

疾內攻心已自危豈足當於謀慮力雖欲彊幾或作
不至於踣顛方奮銳於壯時猶無可道迨摧傷於晚
節亦復何堪雖幸聖君容覆之恩豈道神理滿盈之
罰苟不知退其將殞生伏望皇帝陛下推天地之私
回日月之照察臣粗識廉耻聞臣遽此衰疲丐以一
州俾從素志如此則力排群議已荷於保全遂養殘
生更繫於亭育雖同草木之賤尚識造化之仁

第三劄子

臣近以疾病乞解重任除一蔡亳州差遣已三上表
及兩其劄子陳述伏蒙聖慈累降批答不允斷來章

者臣竊伏思惟臣之披瀝肝血祈天請命之懇其說
甚詳而其誠至矣陛下每降答諭丁寧獎勗所以過
賜優待臣之恩禮亦已至矣而臣不能仰遵聖訓力
疾就職而猶更哀鳴上煩天聽者蓋臣義不獲已與
近日韓琦曾公亮胡宿等從容於進退者事體不同
也臣以非才被任違時忤衆自招謗怒不容其身今
上自朝廷下至閭閻巷陌遠洎四海外及夷狄皆能
傳呂誨等章疏矣其罔誣醜詆之語莫不能道之矣
而臣以顧惜國體既不當更與誨等辯正便合引避
去位而以是非曲直付之公議乃為合理昔漢世大

臣有被誣以罪者例不對理陳寃蓋其人或遂廢黜或被刑誅所以更不自辨可矣未有論議喧沸不自辯明而頑然自安其位者也今朝廷處臣者何位任臣者何事所繫事體者如何而誨等詆臣者何語臣其可安處此位者乎昨濮園之議自手詔告示中外後凡中書論議本未邪正及誨等加誣詆訕等事皆已幸蒙辨正矣惟臣所被邪謀首議姦諛徼寵之惡名既不能自辨若又不識廉耻頑如木石遂安其位陛下謂有臣如此其可當國家之大任乎此臣所以夙夜思惟誨等詆臣者諛佞希榮寵耳故惟有懇辭

重任遠避寵榮乃可以塞小人之口然則陛下聖恩一許臣罷去是爲臣辨誣謗全名節其賜臣者多矣厚於賜以高秩重祿萬萬也臣幸蒙陛下知獎久矣臣之心迹聖鑒昭然洞見表裏此臣不當復言臣所謂辨誣謗全名節者爲中外之人不可家至戶曉者爾蓋非早自引去無以塞誣謗臣者之口也夫爵祿朝廷所以寵臣下也使身心安泰名譽光顯者居之則不勝其榮也若毀辱媿耻憤悶憂鬱者居之適足爲苦耳伏望聖慈察臣哀切懇迫之誠不以臣比從容於進退者特許臣解罷政事除臣一外任差遣則

臣雖死之日猶生之年今取進止

第四劄子

臣近以疾病乞解重任已具劄子罄述懇私更不敢重疊叙陳上煩天聽臣以非才誤膺獎任存之既無所惜去之何足可思然而不早罷去此乃陛下至仁至慈憐臣衰殘不忍遽遂作便棄指務欲退人以禮今臣表章劄子各已三上伏蒙三降批答丁寧訓勗未即允俞中外之人皆知陛下曲意留連恩禮已足伏乞出自宸斷早賜恩許除臣一外任差遣

第五劄子

臣昨日獲對威顏備陳懇迫而言意拙訥不能感動愚誠雖切天聽未回夙夜省循莫遑安處臣本庸材不足比數然而職所任者國政身所繫者國體而遭羅誣枉致辱百端既不自辨明便當引去加以年齒凋耗疾病侵凌豈可勉強衰殘不知庶耻此臣所以披肝瀝血干冒誅夷不能自止者也再念臣材識駑下過蒙陛下獎用固當奮發事業粗立功名上報君恩次雪身辱然臣出入二府已七八年迄無一言建明一事可採以前日之碌碌如此可知後日之無所為也若終於尸祿偷安苟貪榮寵不惟上辜委遇實

亦自負初心蓋材力短長固有不能勉強若進退名
節尚可自擇前世人主之待其臣也事非一端或高
其行義不奪其志或許其閑退俾自安全不必悉以
高秩厚祿但曲從所欲便是君恩伏望聖慈察臣悃
悞特許臣所乞則臣未盡之年尚知論報今取進止

辭覃恩轉左丞表

治平四年正月神宗登極

臣某言伏奉制命蒙恩特授臣行尚書左丞依前參
知政事加階食邑食實封及賜功臣者澤施無外雖
務極於汪洋寵至若驚實難安於啓處敢傾拙訥上
黷高明臣其中謝伏念臣本以妄庸早由平進一經

之學乃自守之迂儒十駕其駑終不堪於遠用徒以
旦暮千載遭逢兩朝擢貳鈞衡坐淹歲月國恩未報
但虞填壑以遺羞金鼎已成豈謂攀胡之莫及幸遇
皇帝陛下重離繼照正統當天萬物覩而成忻大號
渙其均慶致茲孱朽亦玷光華然夫位高而疾顛者
是亦其勢然器滿而必覆者蓋由於量過敢志戒懼
誠迫懇私伏望皇帝陛下特軫睿慈俯矜愚守當萬
機之新政收厚賞於無功則臣雖蒲柳之易一作衰
尚冀消埃於後效

謝覃恩轉左丞表

臣某言云云大慶均行霽流而甚渥鴻恩曲被俯僂以無容臣某中謝伏念臣性質迂愚器能淺陋言不足以備典謨之奧學不足以通治亂之原徒以早荷兩朝之誤知拔自孤生而獎用疲駑雖一作難勉訖無補於毫分歲月屢遷猶坐貪於寵祿方懼黜幽之典敢希冒進之榮此蓋伏遇皇帝陛下光紹寶圖惟新聖政繼離明而大照推乾施以無偏致此妄庸首露渙汗臣敢不退思警懼益勵衰疲感風雲際會之難依日月光華之末少圖後効冀盡夙心表奏書啓四六集卷第三

紹熙三年十月承直郎丁朝佐編次

郡人孫謙益校正

辭一作部侍郎表幸或一作幸

第三劄子夙夜一作夙夕睿聖一作睿聽

大正

Vertical columns of text on the right side of the page, including a large seal at the top and several columns of smaller characters.

Vertical text on the left side of the page, partially obscured by the large seal.

